

光緒山西通志

義行錄上

錄五之一

山西通志弟百四十一

賜進士出身頭品頂戴兵部侍郎兼都察院右副都御史巡撫山西提督軍務張煦奏
旨監修

人物之以義名者其別最多洪氏邁嘗歷舉之而史家列傳必繫以忠孝大抵皆激烈慷慨至性過人古所謂豪傑之士也迹其急忠難疎貨利輕死生重然諾忘己濟物頗近於俠而往往倉卒之際動人觀感足以扶持名教敦厲末俗君子未嘗不予之也至若輸財助官或急公奉上或救災恤鄰春秋時國難毀家年饑餽粟已多行之者前明遂有義門之旌近世風氣曰開人務施濟凡有益地方有裨民生之舉朝廷莫不樂爲激勵令甲所列如恤孤貧贈宗族助賑荒歉捐修橋道資在千金以上皆許其建坊旌里或邀議敘凡以

修王政厚民俗也先儒有言一命之士苟存心利物於人亦必有濟而爲高論者或謂以佞佛等諸歸墨必繩以爲善勿近名陰德如耳鳴之說亦甚非仁人之用心矣茲於事關忠孝者旣別著錄故所列義行半涉推解或亦虞廷九德終以強義周禮六行並重任恤之意乎

歷代

漢至明

郇越晉陽人少明經飭行平帝時州郡舉孝廉茂才後以病去官嘗散貲千餘萬施九族州里志節甚高顯名於世子恁有清節屢徵不起

曹仲叔西河人任俠名聞州郡而有謙讓君子之風

郭公仲

漢書作高翁中

西河人與太原鹵公瑀雖爲任俠而遠巡有

退讓君子之風

右漢三人

又一人附見

祝公道袁尙將初郭援攻河東絳邑長賈逵死守攻益急父老乘城約不害逵乃降比降袁欲以爲將逵不屈援怒促斬之吏民伏其背且乘城大呼曰負約殺我賢君甯俱死耳乃囚於壺關將害之逵且歎曰此間無健兒耶而使義士死祝公道聞之夜半引出折械遣去不語以姓名及援敗乃知後以他事坐死逵拯之不能解爲之改服

右魏一人

田蘭并人晉有汲桑者力能扛鼎殘忍少恩六月盛暑重裘使十數人扇之忽不清涼便斬扇者大姓田蘭斬汲於平原士女慶賀奔走道路而歌曰士爲將軍何可羞六月重襦被狐裘不識寒暑斷人頭雄兒田蘭爲報讐中夜斬之謝并州

右晉一人

廉景孫平陽人少厲志節以明經舉郡孝廉爲刺史房謨所重謨先與子結婚盧氏及卒盧氏將改適他姓景孫代訟之臺府不爲理乃持繩詣神廟前北面大呼曰房謨清吏忠事高祖及其死也妻子見陵神而有知當助申之今引決訴於地下便以繩自經於樹衛士見之救解送有司朝廷哀其至誠命女號房族

令狐仕猗氏人兄弟四人早喪父泣慕十載奉養其母孝著鄉邑而力田積粟博施不已

薛善汾陰人魏孝武西遷改河東爲秦州以善爲別駕族兄崇禮爲刺史守蒲坂善言於兄曰高歡有逐君之罪吾世荷國恩今大軍已臨而猶爲高氏固守一旦城陷首長安署

爲逆賊死有餘愧。盍及今歸款。崇禮猶豫。善與族人斬關納魏師。丞相秦進軍蒲坂。凡薛氏與謀者。賜五等爵。善固辭。封萬護代人。天水公。敕文長子。敕文卒。萬護當襲天水公。讓爵於弟翰。朝廷義而許之。

裴安祖。河東聞喜人。少聰慧。年八九歲。就師講詩。至鹿鳴篇。語諸兄曰。鹿得食。相呼而況人乎。自此未嘗獨食。弱冠州辟主簿。人有兄弟爭財。詣州相訟。安祖以禮義責讓。明日相率謝罪。

右北魏五人

敬珍。河東人。高歡之西伐。珍謂其從祖兄祥曰。高歡負恩謀叛。天下忠義皆欲刺其腹。今又稱兵西上。吾可與兄以兵斷歸路。祥從之。糾合鄉眾萬餘。會歡敗。歸帥眾邀之。斬獲甚眾。

丞相泰以珍爲平陽太守祥爲行臺郎中

右北周一人

郭雋

北史作世雋

字宏父太原文水人家門雍睦七葉共居犬豕

同乳烏鵲通巢時人以爲義感之應州縣上其事上遣平昌公宇文弼詣其家勞問之治書御史柳彧巡省河北表其門閭漢王諒爲并州總管聞而嘉歎賜兄弟二十餘人衣各一襲

右隋一人

王景嵩聞喜人夏縣呂崇茂反宋金剛又寇滄州景嵩率鄉黨千餘家據險抗賊卒獲保全太宗嘉之命檢校桐鄉令不受改爲驃騎將軍又不受高祖聞而徵之及見勞之曰卿固守忠誠克全鄉曲國有常典所以授卿每辭不受何也景嵩

對曰桐臣鄉也拒逆臣分也不敢邀功故辭高祖善其對封桐鄉男加位開府

敬昭道河東人爲大理評事遷監察御史先是夔州征人舒萬福等十人行次巴陵渡灘溺死昭道因使巴渝至萬年驛夢此十人祈哀至於再三乃召驛吏問之吏對如所夢昭道卽募善游者出其尸具酒肴以酹之觀者獻歆乃移牒近縣備檣擯歸之故鄉征人聞者無不感仰

陳正謙上黨人以信義著聞劉武周寇上黨高祖遣王行敏馳救兵乏食正謙出粟千石濟之由是人人自奮賊乃去都兒諫議大夫陽城蒼頭也與主協心城隱夏陽山中歲荒採桑榆皮屑爲粥里人敬以哀饋食稍豐則閉戶不納後里人竊令於中戶致糠粃十數孟乃就地食焉節士鄭俶死城

慟哭自咎命都兒將酒奠之

王義御史中丞裴度之隸人也盜害宰相武元衡又擊傷度首哄導駭伏獨義持盜大呼盜斷義手度墜溝得免而義竟死度自爲文以祭厚給其妻子是歲進士撰王義傳十二三焉

右唐五人

張丕陽曲人李克用鎮太原多選富家子主帑庫或調度不給卽坐誅沒入貲產丕爲之滿歲府財有餘宗人政當補其任率族屬泣拜請丕濟其急丕爲代掌一年鄉里服其義孫穎晉安州防禦使

劉訓河中牙將梁遣張存敬攻節度使王珂珂計窮泊舟於河將歸京師訓夜入珂寢白事珂叱之曰兵欲反耶訓解衣

自索而入曰公苟懷疑請先斷臂珂曰事急矣計安出訓曰公若攜家夜濟人必爭舟一夫鳴張大事卽去不若遲明以情諭軍中願從者猶得其半不然且爲款狀以緩梁兵徐圖向背珂以爲然乃登城呼存敬請聽命存敬退舍

右五代二人

杜遇汾州人官評事儉靜仁慈周貧賑急妻死誓不再娶人稱長者

婁應字循之解州人少負智勇尙氣節祖興起家於解不數年遂致富盛元豐間虜屢犯邊朝廷出師命討應爲解戶籍首計家產過一縣之外科率比他處三倍應以罄產爲誓逮邊事稍甯產已墮蕩八九未嘗有纖芥怨尤子純聰明豁達有父風

劉永一夏縣人居家孝弟人無間言熙甯初巫谷水溢民多溺死永一家濱河每日持竿立門外見有物被衝者輒取還之鄉人負債不能償者立焚其券

司馬浩夏縣人慷慨尚義於宗族恩尤篤司馬氏累世同居口眾產寡浩力營衣食贈之皆獲其所數十年無怨言祖墓迫隘前後二十九喪浩於祖墓傍購餘田悉舉而葬之弟子里早孤浩識其雋異教讀甚嚴其後中進士科仕至太常少卿先是鄉人導涑水溉田利甚溥歲久岸高水不能上田旱不足輸租浩率鄉人請於令築埭下流復資其用溫國公爲撰墓表

右宋四人

王忠立嵒嵐人妻亡不再娶結廬蘆芽山隱居終老

李森高平人年十八澤州發解第一授萊州文學天會間大饑斗米千錢餓殍載道出粟千斛賑之活者甚眾途遇行旅二人病臥垂死掖至家醫治全愈其人感泣而去蓋襄陽人也每森生辰各持方物至而祝之

閻衍沁源人沒於王事以義稱正祀考贊曰德美隱身時危致命

耿升天性好義與妻避兵被執不忍禍及鄉眾遂皆死之州帥聶珪旌其節具禮葬焉子守直登進士金亡隱居三教里終身不出

樊寶忻州人天會間捐粟賑飢存活甚眾

游完崞縣人大定初歲荒完日賑贍二百餘口冬給貧人衣五百套春秋以家財募人平治道塗二百五十里又築來宣

曾濟二橋工費巨萬共號義門

劉貞五臺進士金末兵亂民多逃竄惟貞并父義固守謂鄉人曰爲臣死忠爲子死孝汝等缺食吾盡給之慎勿輕動一鄉之人賴以圖存

右金七人

姚相文水人捐立學田見邑志

張天瑞浮山人富甲於鄉世祖西征道經平陽天瑞以才略備參謀會軍乏食輸粟萬石助之一軍悉賻賜萬戶職錫以五蠻蟒玉墓文具載其事

張利太平人有贖父難者遺金利拾還之躬治蠶桑每生日舉所得絲絮以濟貧人

賈宗仁字體元蒲州人過歲失怙長遊江湖燕趙海岱巴蜀

間十餘年積千金旅次江州有趙某藏二十金於篋忘之疑
逆旅主人婦所竊索之亟其夫不能明欲自殺宗仁出已金
代償後趙理篋而原金見驚愧殊甚淮徐道中偶遇盜同行
者悉匿於田宗仁於途拾金一囊抵徐與同行者分之曰共
患難當共得失歸里後溫清定省曲盡色養居母喪哀毀骨
立壽至九十有七

楊興長子人至正十二年縣尹齊泰奏旌爲高年耆德之門
李洵仁平遙人授麟州新泰縣令皇統間北兵陷平遙時援
兵五千編戶數百家胥被害骸骨暴野洵仁以宦遊免害及
歸深用憫惻同令梁琮募人拾遺骸萬餘於城西鑿巨冢葬
之其子致堯鄉貢撰碑銘記其事立大興觀門右

和居中晉城人性敏博學篤於交游潛德弗耀以高年耆德

旌

賈進大同人大德中地震民居死傷無算且艱食進乃死予棺傷予藥饑者計口給粟冬則寒者衣之又市郭卜地爲義家里中賴活者甚眾

以上諸府屬

楊國祥壽陽人佃漁爲業嘗得遺金失羊必反其主取與不苟以義稱

胡永字大年孟縣人勤學務本鄉人鰥寡貧疾者贍之喪不能葬者助之

韓嗣孟縣人至元間歲饑兩出粟賑活萬餘人

狄元昌字世昌宋武襄公背之後其曾祖順望祖思夏父寬豐財濟人昌善騎射慷慨樂施求者予不少緩有不能償者輒焚其券曰吾身後不可令子孫徵負於人術士相昌多陰

德後可高其門果得子八孫十二中有大顯者以孫東山貴贈中大夫兵部侍郎上騎都尉追封天水郡伯宅墓俱在西莊

王天爵字仁傑夏縣人家饒於財有善行以粟貸人年饑但取其本凶則已之鄉里咸稱義士值始生辰輒寢苦一月賀賁隰州人徙居京兆賁有謀略善攻戰略關中兵後集尸滿野賁爲大冢收瘞之得白金七千餘兩乃持五千兩獻世祖以助軍後以賁總管京兆諸軍與魯卒追封雍國公謚貞獻子仁傑孫惟一相繼爲上都留守

孫秀實大甯人性剛毅喜周人急里人王仲和嘗託秀實貸富人鈔二千錠貧不能償棄其親逃去數年其親思之疾秀實日饋薪米存問終不樂秀實哀之悉爲代償取券還其親

復命奴控馬齎金訪仲和使歸父子歡聚聞者莫不嗟美又
李懷玉等貸秀鈔一千五百度無以償盡還其券以上諸州屬

右元十五人

陳天壽陽曲人事嫠母至孝宗黨某某貧病且死醫藥殯斂
皆出其力又張珠夫婦遭疫人率畏避二子方脫襁褓攜之
以歸卒賴全活

董玉常清源人置義田百畝於堯城鎮建買社學以育才惠
不責償人多高之又時輝牛昭蘇雲端荒年輸粟全活甚多

高智文水人

縣志作高階

又王鷲字鳴皋及李伯現德量寬厚強

暴感化咸稱長者

鄭位文水諸生事繼母以孝聞友諸弟歲試赴汾州拾遺金
悉歸失者性不喜飲鄉人忍爭率置酒解之家頗貧周給無

倦色以子之僑貴三膺封又諸生王在庭拾還遺金又嚴應祥兄弟同爨五十載子國魁孫調鼎胥魁於鄉

孫光勳興縣人歲旱輸賑奏得旌表子守訓年五十無子賈太原買得一妾知爲都司張某女張虧官帑八百兩以女售人訓惻然領囊償之不告姓名而去後舉三子又有王琳拾還遺金官至太倉州牧

孫興太原人尙義好施邑舉鄉飲辭不赴

朱景祥岢嵐人正統間蠲粟一千五百石賑荒勅建坊表又栗仲仁天順成化間蠲粟拯飢表給冠帶

董志山祁縣人行客遺金追還之堅不受謝又高幹公直好義卒年八十九又王璞昶五世孫周急賑荒養姑撫妹人以爲難昶與郝希敏正統年均以捐賑奉勅建坊

桂宏付太谷人正統間捐賑一千五百石旌表

于敏榆次人正統中輸財助官賑濟旌義民

閻表陳立王文胥交城人正德時捐賑各二千石旌表

高自修孫光勳胥陽曲人隆慶中輸財助官賑濟旌義民

韓友范岢嵐人萬歷戊午舉人崇禎間任陝西慶陽知府時
歲荒斗米銀三兩友范設法賑饑全活者甚眾

馬珣陽曲人富而好施閭有婚喪輒爲周助插部內侵捐金
給守城夫役常助修書院及城隍廟費千緡孫諫登進士又
李讓世積德好施予子希賜以明經充恩選兩任巨邑王光
欽萬歷間捐修橋梁表給冠帶

馮瓊字德華陽曲貢士授定興訓導升延津王府教授不就
以孝友稱博學介行舉鄉飲妻卒不再娶卒年七十有九又

陳邦鎮府學生妻亡不再娶表給冠帶

徐永詔交城人任韶州檢校年二十九妻張氏亡義不再娶
壽至八十有一

邱鳳軒嵐縣人虜犯石州率眾禦之事聞拔之太學任山東

蒙陰縣令有治才

以上太原府

薛從周韓登胡志剛胥翼城人捐粟賑饑詔旌異之曰國家
施仁養民爲首爾能出穀麥一千五百石用助賑濟有司以
聞朕用嘉之今特賜爾勅獎勞以羊酒旌爲義民仍免本戶
雜役三年尙允蹈忠厚表勵鄉俗用副朝廷褒嘉之典時正
統四年二月十一日又常遠任愛民王士仁焦欽王永吉亦
嘗輸穀賑饑

張彥直曹義李福榮李興張林胥臨汾人正統間輸賑旌門

段世榮洪洞人正統間輸米賑荒旌爲義民

李德義丁朋益李讓韓聚源梁政胥太平人正統間以輸賑旌門

盧淵王復新孫仲銘胥襄陵人正統間輸賑旌爲義民又喬淮隆慶間捐金修城勅建坊表又高自修歲荒捐賑題授七品官又高濂喬柏隆慶間亦捐貲修城云

王有祿鄉甯人正統四年捐賑旌門又鄭崇仁亦輸賑

楊鳳翼城人好書籍聚數千卷通醫術嘗蓄善藥以濟人貧不能葬者必助之宏治中歲饑出銀若干賑貧乏又張讓陳瀚丁應科亦以修城修橋著義聲

陳琮翼城人累世積德正德間客河東有符某爲同夥盜三百金忿不欲生琮如數付之盜愧感潛以銀還符符返琮貲

琮遜謝無德色又嘗助諸生王某葬事捐修開喜東鎮路橋梁焉

趙德太平人正德中新野典史諸生徐茂者貧幾廢學鞠而成之茂登進士官御史授山西參議首詣德家德已故尊德妻以母禮辟德子楚吏職後楚任盤厓典史

蓋文卿浮山人常拾還遺金又喬登俊歲荒賑貧亦嘗拾還遺金

李秉霖父塌樂施霖能繼之嘉靖間餓殍盈野多作棺瘞之周貧乏助婚喪利濟甚眾嘗患瘋疾手足不能舉久而自愈太平人謂陰德所感

盧登襄陵人好義樂施臨汾舉人楊世正曾貸銀若干後夫婦繼亡二子孤幼無倚攜歸育之猶已子嘉靖七年大饑給

穀賑貧不責償人多義之

賈世隆嘉靖間出粟九十石賑饑縣達諸部旌其閭曰尙行
五世孫佩徵有傳

李承寵曲沃人莊簡之孫孝友謙抑不妄交遊萬厯庚辰貢
入太學同貢浮山趙某宦河西卒於官柩不能舉爲厚其賻
而歸之

商麟洪洞監生與同邑李時春並以拾遺遺金著義聲

張修德秦可興鄧希孔盧宣鄭蓋卿胥襄陵人並以輸賑稱
義

韓允緒字元祥太平生員居家能以禮性樂施予知縣王化
行旌曰恩覃梓里課三子入泮遂與二三知己陶情詩酒有
蛩吟雜著

周鑑汾西人官湖廣按察司僉事年四十妻張卒義不再娶
歷官山東參政二十年家居二十年內無婢妾蕭然獨處時
咸稱其義

王扶殿賈珍張問政胡澄胥太平人並以拾還遺金稱義
譚繼宗翼城人邑中代辦他邑差錢甚爲民累繼宗詣闕訴
請免之

張榮魁太平人商秦隴道拾遺金則鞏昌楊某物也魁曰掩
人之有而有之奚義視人之困而不救奚仁亟追還之王體
復有張義士傳又衛福家貧拾遺金堅不受謝子孫亦頗繁
盛

鄭剛洪洞人素尚義理友人楊敬曾寄白金若干聞其失火
來慰問意所寄併燼矣剛迎謂曰原寄悉救無一失盡還之

歲荒民窘多負官租有司以剛德孚眾委之催督乃諭以大義爭輸恐後其尤貧者白令緩之縣人感其義號曰鄭廉使孫傑進士官知府

李明性字復本曲沃人性重厚有偷兒犯之置勿問偷兒自誑請罪或鬻業偽增價值率償如其指族子某債息過當召而責之手裂其券妻亡當左窆形家以爲不利明性曰家之昌在德不在窆以子尚思貴贈右副都御史

蓋大綏浮山人家富好施歲晚必出粟麥百石以濟貧乏里有寒士常肅禮以餽之萬厯丙戌斗粟千錢邑人許龍出粟千石以賑荒大綏亦與楊森陳萬年出粟佐之

王汝鍾臨汾人施粥周急多義行又張志深夜拾五十金請於縣榜得其人還之

丁放臨汾人嘉靖間率焦堡等九村民開樊家河修堰導水灌田六十頃

張滋尙書潤之弟孝友好義當事委修平水官河疏泉濬渠溉田二萬有奇郡守王濤有張長公行水記高陵呂柟有修平水官河記勒碑龍子祠前

盧熿鄉甯恩貢歲饑施粥半載全活甚眾

孫武臨汾貢生竭力事親親沒三年不入內室嘗館某中丞所片言解紛其人聞贈千金卻不受年七十餘盛服詣姻家歌妓扶以升階歸卽剪其袖

邵錦臨汾人家貧好學閉戶十年貫涉經史市米歸贏一斗急返之或憐其貧有所贈遺一毫不取其介如此時目爲原憲云

侯甸汾西廩生闖賊渡河大哭孔廟焚衣冠僞詔掄才親友
逼試誓死不往遂混跡田畝焉

王志禹襄陵人流寇亂輸豆三百石佐軍需

以上平陽府

陳江蒲州人父卒於外負櫬歸葬事母敬兄撫姪無間言客
池陽人或寄金忘其人訪而還之

孫鎮蒲州人兄弟同居友愛倍至客杭日有婦失夫金懼投
江死解囊活之

陸勝猗氏人宣德間輸賑三千石御史劉爲立義民坊

喬通趙從政正統四年捐賑旌門又荆樹何東觀荊州傑荆
邦余衛文俱以輸賑稱義

牛讓高泉人景泰間輸穀賑饑

王珂榮河諸生力學能文甘淡泊好施濟東萊吳侯深器之

李子隆成化間捐賑旌門荆一書萬歷九年輸賑受義官
王榮蒲州人性孝貧死無棺者助葬之兄弟析居者勸止之
呂太史表其墓

張輅蒲州人正德間兄鑑觸劉瑾將坐重辟輅引罪請死太
守義而釋之有牛伊耕妻溺殺三妾所生五子以妬聞一日
妾賀有娠輅爲畫計激妻逐妾藏輅家生子名張甦垂二十
年教養娶妻妬婦亡始歸於牛

王崇雅蒲州人嘉靖乙酉解元仕至太僕襄毅兄也乙卯地
震郡民死者十三四崇雅父同年進士鄒襄惠奉命齎金勘
賑欲以丁絕地予之潛然對曰蒲民無辜橫罹慘傷崇雅邀
天幸尙忍取非已物乎且絕丁多寄淺土骸骨不掩盍訪其
婚友取貲以爲葬資公仁及枯骨矣鄒大嘆服

喬梓字子芳猗氏貢生萬厯間賑粥全活甚眾更給冬衣者六七百人祀鄉賢

王光宙臨晉諸生爲人倜儻好施濟萬厯戊子大疫設藥拯活者甚眾

楊選蒲州人好義拾遺遺金三百兩散粟活貧掩骼卹困稱長者又劉榮亦嘗還金焉

王三鑑蒲州人商天津鄉人王某寄金百兩暴卒其子不知也後二年鑑歸里還之封識宛然

王守蒲州人里人嘗乞借二千石年荒遂焚其券平時賑貧助婚甚眾子明德明道有父風

王銘臨晉人蒲志云正直有信義持是非鄉人服焉

賈蘭臨晉人輕財好義夜獲偷兒曰爾不足何不告我竟以

所竊物予之終身不言其名

喬岩字雲臺猗氏諸生嘗拾還遺金有盜夜竊其謀明日遇諸驛所羸見主奔號眾議鳴官岩好言遣之後遇盜于途前盜固在曰喬公吾恩人不得輕犯護送里餘而去

令狐景雲猗氏人性孝友精岐黃活人甚眾有報者則曰吾非術士卻弗受子延瓚延器以瀉謹聞孫總亦有孝行鋸讓產焚券後世子孫多雋科第

謝廷輔臨晉人路拾遺金四百兩覆衣坐田中不得其人歸置梁上明旦再往則有乘騎奔號而來者邀與歸且盤飧探物還之其人感泣曰我郃陽人王德爲主人營官事蒙全軀命願以半酬不許請白當事又不許後五世孫陳常聯魁官翰林

荆世承猗氏諸生孝友好義崇禎十三年輸粟賑饑約至二千餘石

張四蔭蒲州人崇禎間大饑出千金易粟賑之

王寵韓太守僕也崇禎甲申闖賊渡河太守夫婦繼死寵視斂畢顧謂其妻楊妾薛曰吾儕雖人僕實明民也豈臣妾賊乎遂製三木主書姓氏至夜半懸三纓妻妾先經死寵乃縊

以上蒲州府

李庭玉潞州人正統中輸財助官賑濟旌義民任昇秦仕胥長子人正統間輸賑千石旌表

張宏栗振金秉文張復旺趙興崔景春李贊董子榮李鸞張鳳李城張恕李果鄭得興王思賢崔深靳良董興楊慶劉岩胥潞州人正統間俱以捐粟千石賜敕獎諭勞以羊酒復其

家三年

路俊郭麟王代昇楊慶王英牛聚良王仕亨閭節路環胥壺
關人正統間俱以輸賑千石旌表又李瑾成化間以捐賑五
百石旌表

韓贍常鑑楊得苗張才成胥黎城人正統間俱以輸賑千石
旌表

王威吳伯雲郭復陳胥襄垣人正統間俱以輸賑千石旌表
王之翰平順人隱居不仕義方訓五子仁施鄉里

杜印靳榮范有亨周公政郟會王新石曇胥屯留人正統間
俱以輸賑千石旌表又范桓石連郗倫禘敏張翺成化間捐
賑八百石旌表

馮爾玉屯留人有義行多助婚喪出粟賑饑成化十八年給

以七品散官

路聰屯留人強幹尙義成化中流寇充斥糾眾縛其渠魁縣令某被誣罷去倡義治裝送之又嘗說橫璫使自斂戢人以爲難孫王道官光祿卿

栗玪長治人成化間捐粟千石旌門又萬厯間郭思極同母萬氏以捐賑一千三百石旌表

趙世濂襄垣吏員任巡檢罷歸嘉靖八年餓殍盈野捐地掩骼數千具御史趙鏗奏請旌表

任翔長治人勤學好義建書塾修橋動以千金計子環官光祿卿

徐佩長治人隨征倭寇大戰于八團營賊拔劍徑趨光祿任環所佩急以身當之而死任旣得免遂大破賊

楊希賢屯留人嘗受馮甯寄金若干甯死子不知也舉以還之封識宛然

王慶襄垣吏員任縣丞施財好義於陽澤門外創建石橋利行人費數百金至今賴之

王汝楫黎城諸生崇禎間流寇圍城乘夜偷入楫出油數千斤於周垣上下悉懸燈炬遠燭百步賊謀遂沮又捐米遍給守城夫役胥爲盡力邑賴以全

賈夢鯨字禹門長子諸生崇禎九年蝗災捐貲募捕盡納阮中得無害十二年流寇猖獗招鄉勇備器械登陴戒守會撫邵蔡來巡見之喜甚亟勞羊酒竝賜一方保障額以旌其能李養志黎城人以孝友著教里中子弟周人饑寒嘗作砦于臥牛山脊以禦流寇又與諸子登埤守城舉明經授忻州訓

導闖變伴狂歸里以長子甲黃贈文林郎弟養裕死難以上府

董謙介休人洪武中官醫學訓科好義有勇略時邑山水數發羣議築隄障之謙日夜督課蠲金錢勞其勤者決旬長隄屹立流賊猖獗謙率子瑛壻秦冲提鄉勇三百人徑搆其巢賊黨驚潰賊復乘夜奄至謙橫刀搏戰至明子壻復左右翼之賊遠竄不復敢窺介山人胥稱之

張得滿賈彬俱汾州人以輸穀賑饑旌表又王志可正統間輸賑旌爲義民

王玘白海劉儀郭贊胥甯鄉人正統間俱以輸賑稱義

李冲郭厚楊贊劉雄胥平遙人正統間俱以捐賑旌門又雷應正萬厯間輸賑千石全活甚眾

梁晟董澄胥介休人正德間俱以捐賑旌門

劉德仁汾陽人歲旱發願禱雨遂自焚死大雨隨注州司葬之至今稱爲義冢云

嚴敏汾陽人天性好施衣食棺木藥餌濟人者終身不倦白惟能臨縣人歲荒輸賑千石事聞旌表給冠帶

張雷魏廣俱永甯人正統六年輸賑一千石授義民散官王子深甯鄉人拾還遺金以義稱

劉見龍臨縣人明末諸生鼎革後薙髮令下見龍執不從事發官敦諭再三怫然曰丈夫甯玉碎不爲瓦全引頸受戮上以

汾州府

侯完侯永趙獻何真正統間各輸米二千斛陳鳳翟璟李綱成化間各輸米四百斛柳富春萬厯間輸粟千斛李泮亦輸

米五百斛俱沁水人旌表如例

徐璣趙翺並陵川人正統天順間輸賑旌表

郭文會陽城人正統間輸賑二千石旌表又有栗文輝陳大億吳奎俱捐賑旌門

徐潮徐鉞徐鑽徐樑武鶴王興胥陵川人成化間輸賑旌表甯溫甯演宏治間輸賑旌表

牛耕陵川人正德六年流賊陳卿率眾突入太行至平城鎮執耕問曰陵川與壺關孰遠近耕始曰壺關近且平陵川遠且險至壺關界問眾尙遠賊以誑已遂刃耕于西火鎮而二邑胥免難

張垂芳陽城人有義行萬厯間以輸賑旌表

朱充燧明宗室輔國中尉孝友雅飭焚券賑粟施惠三十載

瘞骼千餘又有仕壤成鎮聰濂

一作凍

俊裊充俊俱以孝義旌

表賑荒勤學皆稱賢王孫云

延人秀陽城諸生負氣節遇賊被執索金不得賊曰卽無金
敢不跪耶秀曰我膝可屈必不肯屈于賊賊怒斷其臂而去
王海字大量陽城人立義學建義冢賑貧乏助婚喪惟恐不
及

以上澤
州府

李雲鳳靈邱人嘉靖間兵防乏餉鳳以布衣持數百金走大
同犒軍事聞旌表

李滿大同人力田好周濟子承弼承式胥取科第

曹得懷仁人由燕山左護衛總旗從平內難勇銳前奮以一
當百累升中軍都督同知守德州御下不苛

王憲武山陰貢生好義樂善嘗返外家裝資卻從兄絕產全

難婦贖人妻子家屏位至宰輔

梁祥山陰人多善行修葺孔廟及城隍諸祠胥捐已貲人服其義子庠令上猶

張錦山陰人妻死義不再娶有司旌其門

以上大同府

趙傑楊浩並遼州人景泰間俱以輸賑旌爲義民又裴輔亦輸賑千石人皆頌德焉

徐煥和順人正統間輸賑千石旌表

喬舞鳳榆社人家貧拾還遺金初無嗣後舉三子又常紹緒李應科亦嘗還金焉

田粒民周之正皆榆社人俱二十餘妻死以有子不再娶人

義之

以上遼州

宋冕沁源人洪武初輸粟千石助軍需天下既定以功授琅

郛知縣

程碧武鄉人正統間捐賑三千石旌表

牛讓沁源人景泰間出粟千石賑饑旌表

郭紀沁源人偕弟縉以力農富好施建義塾置義冢助婚助葬嘉靖間紅巾賊起過閭不入曰義士家也二十年邑旱捐賑一千五百石奏得旌表子昂刊日記故事行世

牛貴沁州人嘉靖間寇犯城下輸米百石以濟兩拾遺金一還其人一不得其主建橋五座以義稱

王繼沁源諸生樂善好施萬厯間大疫施藥活人又嘗輸粟助修郛城壽至八十

吳檜沁州人孝友謙恭歲饑出粟賑全活甚多

沁州

郭布岳陽霍九德鄭士廉胥壽陽人正統間以捐賑旌爲義

民

張有餘樂平人正統間年饑捐粟萬石又張恪張崇義劉執中李惟秋歲荒蠲賑有差

楊璟正統間輸粟賑荒璽書褒美以子清貴封文林郎
高鼎孟縣人成化間歲荒鄉人多逋鼎日計存者給糧全活甚眾又張宗政弟宗顏朱玉歲饑發賑鄉人賴之

白思聰平定人父儀以好義間宏治間思聰承父志賑荒授承德郎七品散官又王斌設粥施藥亦以義稱

朱綸平定人隆慶萬厯時修城捐銀歲荒捐米又生員和蘊敬歲荒輸粟與同庠李采立義冢俱蒙恩詔授儒官又張嵩齊海楊朝臣徐煥俱以救荒旌門

高超家貧力學尤精篆書教授生徒多賢士事母以孝聞助

婚葬剖曲直閭里感化盡至八十而終

郭瑜郭珍呂志貴施鼎張鶴楊威高介皆孟縣人歲荒捐粟或一千石或五六百石並得旌表

閭明孟縣人性孝友嘗出粟賑饑又張拳子玉孫廣及顯三世皆樂施濟眾捐賑至數千石奉敕旌表

楊一魁孟縣人少商遼東有女避兵攜金三百兩以自媒弗許訪其舅送還納妾崔氏入門流涕立呼其父迎歸不索直後竟舉子孫亦多賢

李源孟縣人元進士朝英曾孫鄰有失馬者誤認源馬與之不少怒後鄰得馬復還源焉子公勤獲盜麥者詰之乃戚也囑父與麥人稱世德

侯定國樂平人家貧事母孝納妾李氏見其子憫而還之撫

姪宸成名

以上平定州

孟彥和忻州人洪武間宋士廉等謀叛以計擒之賜銀旌功
鄺君積定襄人洪武時亂後尸積與妻寇氏親歷郊野設法
瘞之歲時致祭不替韓信甫嘗出粟賑饑學校祠宇多所督
建洪武中授八品義官辭不受

張昇王經宿昶武謙周仲德並忻州人俱以年荒捐銀粟旌
表又范永澄凶年助賑全活甚眾

邢銓忻州人每冬構橋南河濟涉嘉靖末虜俘人口逃回餒
不能行銓以餼糧給之全活甚眾子瓚亦有父風

薄琦梁志學並定襄人正德間出粟賑荒樊鑑由廩生官麟
遊丞嘉靖辛酉大饑遍賑鄉里

張秉誠忻州人流賊入晉眾議避去誠言賊無定處逃將焉

往糾眾守堡累敗賊州守壯之薦於代州睦總兵以功授守備卒

李鳳靜樂人年二十五失偶不再娶持躬方正壽至七十有五

郝登科忻州人髫年拾金還人又王敬王承碧俱還遺金

石應樓定襄諸生崇禎間同張鳳來捐米爲守城計俱以義稱

以上忻州

高智甫代州人洪武間大饑夜獲偷兒與粟遣之人稱盛德
梁宏崢縣人正統間蠲賑旌門又李斌石公廉李志厚郝士
榮武士榮天順間以蠲賑授七品散官

李斌代州人天順中輸財助官賑濟旌義民

孫鳳代州人察地知泉令疏渠溉田千頃家嘗獲盜慰遣之

終不言其姓名子岐鄉薦

陳翔王璽王瑀韓勝傑張懋楊宜春並五臺人捐粟賑荒賜冠帶胡彥質彥卿邊永瑞捐修學宮共約千金

劉子實五臺人拾遺遺金妻張避礦寇率子婦孫女投崖皆得不死其崖石上有女履跡咸謂神效

按府縣志作子實

楊資崞縣人捐金三百兩完官賦得旌表又石盤代償民逋

張存智還金輸賑閭俊鑿山架橋俱有義聲

以上代州

吳學禮保德人捐立漏澤有司給冠帶

郝有玉河曲人籍陝府谷爲諸生父與某甲合貲貿易甲病篤以百金付其父曰俟兒能立始畀之人莫知者頃之甲卒父亦病將死呼有玉告其事並指埋金處後甲子長以金還之河曲尹田思孔旌其門白君琬爲作傳

康明秋貧丐住州東門外牛坡賊猝至時城門開秋急登屋以瓦擊之賊稍退城中乃設備事平給賞不受扁曰奮勇擊賊以上保德州

劉復禮安邑人洪武間兄復初里選中人才時兄未有嗣復禮願代往授沂水邑丞令干紀丞坐失舉罪曰爲臣若此何以自白且如後代何遂不食死七世孫澤商于淮有負貲累千金者貧無以償遂焚券

李福榮解州人正統四年以捐賑旌門

李文質南思忠晉芮城人正統間輸粟賑饑旌義民又李沛生亦以輸賑稱義

張璉夏縣人宏治間賑饑

張綱南安邑人嘉靖丙辰輸粟八百石以賑荒

侯大本解州人撫孤賑貧拾遺遺金鄉里稱之

李通拾遺遺金著義聲

曹希舜安邑人勤儉好禮又楊吉士性耿直時號楊公平

劉春安邑人力農課子解紛周給人並高之

劉近寬安邑人有孝行官京倉大使以清廉著又路旁穿井植樹行人賴之

郭國泰安邑人山海關都司辭官養親撫孤姪如已子庚辰大祲出粟數百石以賑族黨又劉有占任蘇遼副總兵是年年亦捐貲賑饑

曹恭夏縣人爲童子師拾遺遺金數百兩行田間遇盜禾蔬者亟避之

張憲夏縣人與族叔瓚俱以言謹化里人憲娶舊妻生二子

終身相敬不衰

裴紬夏縣人善治生好助人婚葬戊子壬辰捐粟賑荒至千石辛丑寇變輸金二百五十兩豆穀三百石馬數十匹蒲商某假貨貿易被盜懼不敢歸紳曰全軀足矣貨何足云兄純爲諸生尚義好施子錫綸並有父風旌獎

盧應詰夏縣諸生歲凶發粟二百石貸邑人又建義塾八十楹延師教族里子弟胥給膏火資族子某貧且廢學及邑諸生某力不克婚葬胥助之義冢橋梁修建尤多

張瑛夏縣人官榆林永豐倉大使副使有薛春鬻女得銀十兩償糧亟贖還之後升巡檢道出荏平女已適舉人劉甯父女肅謝酬金堅不受壽九十餘端坐而逝

胡以成夏縣人好周急或竊其田禾亟避之鄰有新婦失金

釵翁姑急索倩工製就給還其家俄獲釵驚問以成曰失釵事小儻致不測所傷實多姑爲此以解耳其人愧謝

齊忠義夏縣人母疾捐修石橋以求愈後屢毀屢修無怠色又有馬上德建朱呂橋里人劉養勇助之

王漢夏縣人拾錢不得其主以造橋梁虛存義拾金還主備粥賑民又胡以修賈守約姜一貫張植並以還金稱義

崔榮平陸人嘗三詣闕下籲免荒糧詔從之

李宏平陸廩生設社學捐官租輸賑掩骸捐築外城代銀納馬爲善不倦

任紹統芮城人出穀千石賑饑勅令入監以旌其義

以上解州

鄭恩絳州人正統間以捐賑旌門又辛思恭梁瑤耿維哲亦嘗輸賑焉

張林李興買金並聞喜人正統四年胥以捐賑旌門

丁貴垣曲人成化間以捐賑旌門

許河絳州人城南創建浮橋州人便之萬厯十四年偕許敦實輸金助賑

吳國相河津人萬厯間拾還遺金以義稱

劉承雲河津人官光祿署丞萬厯丁巳捐賑至二千金旌門
又李子隆任寬柴彥解得永普安然薛原修吳有任直文俱
以捐賑旌義民

趙軌河津人歲荒輸賑二千石生平資助婚葬者七十餘家
趙統絳州人買西甯嘗鬻木綿數萬斤僕潛輕其衡卽折衡
而逐之積粟減值以濟饑不能償者胥貸除又拾還黃金數
斤人以爲難

張國紀絳州人業賈周忠介被逮時緹騎索金卽投緡船中
倡諸賈飲助之傲居三林有謀囊橐盜者責以大義復出私
囊周之由是鄉人獲免難

孫統絳州人客三原或貸金五十如約償還子母已入惻然
憫其苦爲焚其券與之又捐金賑饑市席掩骼秦人德之
張貞教絳州諸生時有宗室逼居學宮欲毀牆垣以通馳道
與弟名教奮力爭之禍幾不測白諸當事事乃平後由歲貢
授澠池訓導

衛登強絳州人好義樂施嘗爲族人代納丁糧時無子相士
謂有陰陽紋年五十當舉子已而果然又衛聚德亦置義田
供族逋賦韓傑惠濟族人亦置義宅

陳鎮明絳州人好詩書隱于商遇困乏者力周給之嘗著復

性語以自娛見三晉語錄中

張真絳州人遊雲間晨溷盥水地隙中受水甚虛怪而發之有錢一罌遽掩之里中亦以孝弟聞

解良溫聞喜人孝事繼母拾遺遺金又有溫儆亦拾遺遺金溫洗字汝厲聞喜諸生七歲就外傳長跪誦書曰僧家誦經且然何況我輩幼孤事兄如父析居後一日不見亟候之遇諸途必趨揖問所向雖毫不衰嘗之南橋見樵夫投水問之爲驚布被盜不敢歸見母給曰我得其人矣引取妻所績布以與之行田間見盜果者在樹疾退而匿拾金不昧寬洪不校詳見光祿文翔鳳志

解省身號東野聞喜人謙和恭謹每朔望聞木鐸及官府傳呼聲雖坐臥必起肅立年至九十弗少懈

楊佐聞喜貢生冬月袖扇路遇婦女輒自蔽失偶不再娶邑人稱爲楊古

楊仲李玪並聞喜人輸賑修橋以義稱

李儀聞喜人志稱孝弟力田疎財仗義

王贊聞喜人篤實端方毀家救荒絕口不言人過

邵文煥字鳳衢由選貢令冠縣遷處州通判事親克孝居鄉捐金賑荒修城多義行

梁蕙字若生稷山人紀子廩監遙授西安府通判博學工詩書法揮灑入神嘗開義倉以賑饑民給乳媪以活棄嬰著六種吟行世

張三綱賈日鼎並稷山人胥以還金稱義

閻士堯王世勤賈王勝並稷山人胥有輸賑之義

常延垣曲人爲藩掾不樂仕進倜儻好施予

劉際隆垣曲人儉而好施歲荒輸賑一千二百石得旌表後又荒輸一千餘石縣令喬某詣視其困存不盈百嘆息而去文希程垣曲廩生憲副皓孫貲產遜異母兄弟一日拾梁姓白金一觔卽付還梁謝不顧

劉光薦王得民並垣曲人周急扶危代完逋賦族黨德之郭從林馬服主並垣曲人崇禎間捐助軍糈尤以廣掩骼骸著義

王宗仁垣曲人崇禎間罄貲賑饑不足則借金遠糴以濟之全活甚衆又有張繼美亦輸穀賑荒

張翼舒河津人崇禎庚午舉人工文章尤勤教育及門多名雋士庚辰歲荒賑粟二千石有奇

吳思聰李思誠並絳州人崇禎間輸金賑饑思聰尤好掩委
豁云

康丕承絳州人崇禎辛巳歲大饑賑粥施藥全活甚眾闖賊
渡河勒餉代兄丕景受刑無怨又嘗修建汾水橋先聖廟城
上瞰臺城南石堤及師吳某夫婦養生送終諸事踴躍爲之
不少吝

魯紹孔垣曲諸生置義田建義宅遠歷東魯扶叔柩歸抱疾
往秦尋從弟獲之崇禎十三年捐貲賑饑

以上絳州

郭昇蒲縣人出粟賑荒正統六年旌門又韓藝正德間輸賑
六百石

鄧鳳隰州人急公好義輸米賑饑倡植桑麻其撫孤姪至成
立尤有聲

史登義王復榮宋良儒楊春濤俱隰州人以輸賑稱義
曹自得大甯歲貢性廉介家貧乏米出門求貸路拾遺金還
之

馮玉貢生幼孤好周卹邑有干黿零丁無歸撫養婚配至成
立厚賜遣之黿由監生除淄川丞事玉如父終身不替
藥料永和人崇禎五年聞賊圍城手持火具擊殺無算賊懼
而遁隨出已貲設兵三百一時賴之

張士粹字懿宇大甯貢生崇禎七年出粟賑饑又以廬墓稱
孝

曹良棟蒲縣人素行狷介崇禎七年大饑棟久不舉火親知
聞而餽之棟曰吾既不能自食而反因食累人於義何居堅
卻高臥七日而死

馬行敏永和人官西安照磨崇禎八年土寇充斥單騎追至石樓手斬二級以還十五年知縣冀殉城死經紀其喪並送眷屬歸里

以上
隰州

鄭琬霍州庠生聘張氏女既而女患篤疾張自求退親琬不肯曰古人有娶雙瞽者吾雖不及古人豈有背義而別娶耶竟娶之遇待更從厚焉

黃景春霍州人幼貧爲酒家傭有客攜妻子假宿者次日早行遺匣景春開視胷金飾也追十許里付之客分半謝之景春不受

閻思學靈石人好施予萬厯間輸穀五百石賑荒旌門明年大旱禱雨術士索銀三百急如數付之術士曰世有此人雨將至矣果雨三日又正統間劉英輸賑旌門景泰間蔡友福

助邊餉嘉靖間張芝輸賑俱授七品散官梁儀鳳萬厯間以輸賑旌爲義官又劉英輸賑稱義

賈煥原敦楊芳張亨衛全晉趙城人成化間以輸賑旌門又賈猷賈鐵賈鎮賈鸞賈清師麒俱輸賑授七品散官又王士通喬友恭賈錡賈淮賈沂賈子豪劉瑄賈思義俱輸賑旌門授散官

以上霍州

右明三百二十一人

又二百十三人附見

山西通志卷一百四十二

義行錄中

錄五之二

山西通志第二百四十三

賜進士出身頭品頂戴兵部侍郎兼都察院右副都御史巡撫山西提督軍務臣張煦

旨監修

國朝

諸府屬

楊鉄太谷人輕財好義聞賊之變男婦五百餘人走避其家出粟食之子永清亦爽直有父風

耶萃然嵐縣人姜瓖之變率鄉民擒獲偽官繕備城守與嵐二縣賴以安全其族廩生挺然癸巳歲饑出金粟賑濟亦著義聲

孫炳高陽曲人一日遇逋賦十餘人繚綬過其門爲惻然卽出金代納縣令圖獎之

張林春陽曲人善醫尤精針灸有以病延請者雖風雨必赴

不受藥資或來求診必款以飲食昆弟七人同居食指盈百未嘗有違言年踰八十卒同里黃守忠者亦以焚券稱義

馬電太原諸生性仁厚好周人急施粟施藥施糶終其身里人劉養病棘以所積四十金託電後五年養妻歿他適訟於官電曰誠有之第養遺言俟其子婚娶乃給還今子未十歲若何官曰第與之電卽手四十金還養妻又出四十金曰此五年子錢也官躍然起曰義士義士蓋電所爲類若此癸未聖祖仁皇帝西巡幸其家電率四世子孫跪迎

賜坐問年幾何對曰九十

聖祖大喜解御服衣冠

賜之書秀眉二字匾懸其家後諸孫成武舉四人

辛一成榆次餅師也一日有客市餅遺小楸而去手之約十

數金客去已遠輟業迫及以祿還不問其姓名而歸

郝銑榆次武生授職千總慷慨好義周急扶困千金不吝

趙光文榆次人家饒於財康熙辛丑歲饑出穀以賑友人張某負人金不能償爲代還之

白長庚太谷人父沒諸弟幼教養兼至後皆補諸生辛丑大饑出穀數百石助賑設義學教里子弟貧者更資之

戴祚祥祁縣監生孝友性成遇諸兄急難引爲已任康熙中兩遇荒年出金粟以賑嘗立義塾課子姪及里黨之秀者又監生程作賢於災歲捐米公所爲食以待餓者歷三月不懈又錢承州嘗賑辛丑饑建橋通衢

盧應魁祁縣人力農起家事繼母以孝聞睦鄰恤乏里中之孤貧無依者輒收養之

郝培彞祁縣武舉縣舊設里甲假公科斂久爲民患偕弟諸生培璧籲諸當道損益舊制更定爲二十四都春秋徵輸按戶自完納夙弊盡革縣人勒石以志

程泰然祁縣歲貢營築五馬河隄開渠灌田村人利賴同縣劉銳建橋沙河頡偁修葺學宮又舉人馬雲駟歲貢羅光珺諸生梁鐸武生楊殿章及溫又厲梁鉉李讓生並以疎財仗義爲里黨推重

高居謙文水歲貢嗜古篤學事親極孝父卒遺逋券數千金悉焚之次子聯癸卯舉人

陳所志文水諸生鄉居有行誼每朔望必集諸子於宗祠訓以忠孝王澤長社師也父設立義學澤長承其志訓蒙不倦以贊來者皆卻不受

田大業文水諸生嘗拾遺金聞汾陽某商以失金搆訟卽攜以詣官封識宛然又張法祖亦以拾還遺金爲有司屬旌

郭崇垣交城人饒於財適縣中協辦軍需索馬甚急里人苦累多逃亡崇垣出貲購健馬數十匹爲供億縣令薛亟獎之郭貴家小康而見義勇爲村有貧而鬻妻者力阻之償其價復貸以資本俾習買販夫婦感泣祀之終身

楊漸達交城人少以義俠稱埋齒掩骼年八十預知死期沐浴端坐而逝

李瀛萊尙義好施嘗建洞渦河橋城東五里許南北孔路也捐地構屋冬夏施茶粥人比諸義漿云

馮雲龍嵐縣監生性耿介路拾遺金三百訪其主還之

孫天繡興縣人崇仁令世蓋子少豪邁讀書輒成誦嘗言道

在人倫功在日用識者以爲確論子正淦爲趙某所殺獄成論抵三年猶未決天繡乘閒入獄刺殺之自繫請罪著復仇或問以明志歲旱出蓄米減價糶之不足請於官祈兵米平糶而以其價予兵市估以平

孫承緒興縣歲貢性長厚與人無競凡疲癯殘疾無歸者收養之死具棺以葬田舍有餘聽人租賃未嘗執券責償久之鄉人皆化其德習爲仁讓又孫振基亦喜推解道拾金珠盈篋守還遺者

王君寵興縣諸生性剛直博學多聞慷慨喜施子親黨告急必量力資助康熙壬寅歲歉罄發儲粟減價平糶日持錢以周道路之流亡無依者男女皆得棲止遠近頌之

程德明陽曲人家素豐好施予每農事起令鄉人擇業爲生

無貲者資之時出錢助婚葬於孀婦尤樂成其節歲歉則以脩地爲名無老幼咸給以食鄉人習以爲常渾忘其用意之所在也子萬里由武進士官守備

劉達陽曲人敦孝友重然諾嘗服賈中州有都司王某大同人也交最久王奉檄赴四川軍營瀕行以妻子並千金託已而王沒軍所達收其遺骸出所寄金益以息還其妻子護送歸里人咸義之援例授布政司經歷于裕元敦篤有父風魏全唐陽曲人跛一足而操作勤苦事親極孝值修學供力役三年不受工資所居村濱河地久爲水沒後水退全唐招夫疏渠並榜鄰村俾各認地鉤稽成圖均其利一時義之張永節陽曲人乾隆初歲荒出錢粟賑其鄉里罄所積至次歲麥秋乃止村無流亡

武而謙太原諸生少時貿易中州積四千餘金聞母病急歸
母喪畢復至豫則積金已爲同事乾沒人謂鳴官可以追給
慨然曰吾賈此爲養母也今已矣豈以財興訟耶族人某寄
資遠遊人無知者某沒於外無子出所寄資並加息畀其旁
親又張卓菴者亦以輕財尙義爲鄉人所欽

齊文熙清源人少孤事母孝雍正中遊瀋陽拾遺金百七十
兩追還其主

王訥太原廩生事繼母得歡心豐於財親故賴以舉火者常
數十家歲盡出資助賑以時平治道途遇有營建一身任之
李齊喬附貢生嘗賑丁卯歲饑倡修文廟行事與訥略同
張光旗太原人事父母以孝聞撫兄子有恩邑有義舉傾囊
資助嘗於路檢得遺物遍訪其主歸之

史必信榆次人捐千金置義田以贍宗族有范文正遺意
胡光地榆次人治家整肅厚於族黨有窮老節婦三人力爲
表揚時周其困乏乾隆壬寅別開河渠一村利賴嘗遊京師
過深澤見聖廟像露處招其里人倡捐百金修葺之
賈懷璠太谷人鄉居義舉甚眾嘗客塞外於平泉州創修養
濟院又建石橋於土城子蓋無在不以利濟爲心者
張文清祁縣監生父進朝以義行爲里人所重文清尤喜推
解歲入有餘悉以給里中貧者

顏煥章祁縣人勤學至鬻弗倦嘗出重金葺卜子夏祠歲饑
擇村中貧者月餼以粟李裕仁者亦竭資賑饑鄉人惠之
渠呈華祁縣人嘗拾遺金還其主無德色又范世芬里人貸
金四百貧不能償芬折券畀之復給以貲

康富祁縣人性喜施歲歉有鬻妻者焚其券厚給之子福旺亦有行誼乾隆中出貲倡開新渠資村人灌溉

武配德祁縣人嘗建團柏村石橋人不病涉

渠飛熊祁縣諸生善歧黃術藥不受值嘗曰濟人利物儒者分內事吾家貧不能廣施遑計利爲子殿颺孫渭並領鄉薦袁佩璋亦諸生善鍼砭應手取效雅以氣節自負趨人緩急不責報文行爲一時所推

閻成蘭祁縣人起家商賈利濟爲懷乾隆丁卯出金建井陘大石橋歷四年乃成又設義莊甫經營而卒子霽霈克承其志並多義行其後井陘橋圯孫附貢安復葺成之

閻輔邦霽子也由武舉任肇慶都司歸里後值歲饑出資於張名村開二渠以工代賑轉瘠土爲沃壤灌溉之利溥焉

梁光祖祁縣廩貢孝事繼母與弟友愛無間所居村當衝要
遇有差務多獨力支應村人戴德又馬普雲善處鄉黨與同
族馬慧馬強俱以尙義聞

張遇隆交城廩生乾隆中建橋資窰河行人惠之李裕仁亦
以尙義稱丙子歲饑出資助賑多所全活

田寬文水監生乾隆間汾文二河交溢所居村淹沒殆盡惟
寬家地高廠村人悉走避出粟共食凡四閱月被災者無以
爲家又竭力賑之全活以千計

趙福基文水人事繼母以孝聞性慷慨家遺逋券數百千臨
終出示其子盡付之火後有詣門來償者悉以無券卻之
史韜光岢嵐諸生乾隆四十八年歲大稔捐粟一千餘石以
賑嘉慶癸酉歲又饑捐賑如前

山西通志卷一百四十三 事紀
劉妙興縣人雍正丙午大饑盡出藏粟以贍其族乾隆丁巳
丙子兩遭荒歉仍計口均給不足稱貸以濟賈奇林者亦於
丙午賑饑縣令欲旌之固辭

呂立德興縣人事親孝兄卒產爲其子所蕩輒出千金償之
嘗於逆旅獲遺金守還其人有因貧鬻婦者爲贖歸且資之
俾營生計

孫趙興縣人闊達喜交遊力田起家所居在合查山陽當嵐
臨通衢四方往來多投之扶困濟危不吝推解親黨有來依
者爲給牛種俾墾殖賴以成立者至數十家

康庸炳興縣人以孝友聞嘗佐孫文定公幕甚爲所倚任性
好施修橋梁捨棺槨哺餒絮凍歲恒爲之

張承志陽曲賈人也喜讀書遇古人忠孝事輒筆以授子鄰

有將鬻妻者給粟贍之爲覓生計鄉里有爭曲爲排解所居村不興訟者三十年子誼舉於鄉

張光祖陽曲人仁厚睦族乾隆初歲歉出千金煮粥賑饑黃天福陽曲人嘗以時平治橋梁道路以利行旅凡凌井溝黑漆崖素稱奇險者悉開鑿至厯數年工始克竣後其孫玉鼎又募工重修嗣其善舉

文奎陽曲人工製筆造墨屢拾遺金皆訪還之中年失偶子爲續某氏婦至期奎往迎聞其姑媳泣別甚哀曰此孝義婦也卽以所持金畀姑令全婦節

宋獻廷陽曲人乾隆末出粟賑饑陰海龍議敘千總嘉慶壬申歲設煮粥於村祠以飯餓者又宋大章亦以好義著稱古思恭交城人敦孝友重然諾友人王某家富子幼臨沒以

託後某子復天思恭撫遺孤經紀十年富倍於前其家後酬之謝弗受同時李培因張國泰王維和並有行誼鄉里稱尙李毓奇徐溝歲貢嘗授徒村寺僧雖太原高德謙者每濟聽講憐之代出貲令還俗從學遂爲諸生近族舉家患疫無敢視者爲延醫進藥一家均愈而毓奇竟染疫死人皆惜之張華徐溝人嘗途中拾金三百坐待其人還之子廣儒由拔貢仕福建武平知縣

李世德奇嵐諸生所居村當嵐興通衢世德夏施茶水冬舍裘衣隣境胥咸戴焉

孫緒榆次舉人事親以孝聞族黨有緩急推解不吝嘉慶癸酉丁丑歲屢歉出米減價平糶罄所積轉糴於市以繼之

劉覲錫榆次諸生事親能盡色養嘗拾還遺金收租佃戶憐

其貧貸之復給以錢道光元年舉孝廉方正

楊騰鳳周順天並榆次人扶困濟危義重鄉里王萬慶得遺金待其人還之

王萬金榆次人家不中貲而見義勇爲歲饑出粟贍族全活數十家許慎修道光中徐水漲沒廬舍村人罹患者走避其家男女至數百口日給米供爨不倦亦無德色

吳郁太谷人家貧服賈遼東道拾遺金六百守還其人

白澄太谷人急公好義縣中大役如學宮書院皆所經營從兄某官直隸通州虧帑甚鉅澄寄萬金助之某手券以田產爲質澄匿焉臨沒召子姪出券焚之曰母令後人藉口

郭煥章交城人嘗建橋以濟行旅又諸生燕懷璠承兄志捐修書院均以急公好義稱

張滿福交城人道光乙未歲歉出資振濟有盜禾其田者不勝負荷顛焉適爲所見近前扶持盜慙委禾去仍追予之王純清源鄉人起家商賈道光癸巳歲祲煮粥救饑明年春復分給籽種咸感其惠

郭良棟岢嵐人精醫術時採藥山中手自炮製每隆冬大雪撒粟淨地以飼鳥雀其利濟爲心如此以拔貢歷署絳縣垣曲教諭又州人王元吉善治瘍貴賤一視之不受藥值

孫豹章興縣人性豁達喜施嘗出金三千倡設書院縣城濱蔚汾水夏秋暴漲爲患築石隄百餘丈障之居民獲安卒祀孝義

郭廷獻興縣武生嘉慶甲戌歲荐饑出粟賑其鄉里嘗倡修岢嵐試院邑中河隄書院悉助成之

楊長齡興縣人慷慨尚義嘗有盜入室捕得則其鄰也急慰遣之癸酉甲戌荐饑兩次賑濟邑人頌之

崔應韶興縣舉人性廉介不苟取予弟應璋疾其婦典匭資供醫藥及弟卒婦將改適度不可留乃計昔所耗資別貸以償婦辭應韶曰爾昔爲弟婦義當同休戚今義絕矣豈可相負令吾弟含恨九泉耶卒予之其他行類此

侯秉文榆次諸生與兄秉忠相友愛咸豐三年大水力拯鄰災出粟數十石餽之

侯汝霖侯維礪並榆次人庚申歲祲捐米一千四百餘石以濟貧乏維礪從弟維屏維烈咸助賑云

孟建春太谷廩貢嘗仿范文正義田法捐金五千存宗祠以贍其族又以錢萬緡備書院膏火他如恤貧養置漏澤施棺

釋散絲衣皆恒爲之縣有興作無不力程其事軍興創設團防立輸米五百石以餉團勇家中落至稱貸以濟不恤也張貴珍徐溝人有遺金數百於門首者追還其人

王琳清源鄉人咸豐三年歲祲捐米五百餘石以濟貧乏

趙福貴交城人事親以孝聞光緒丁丑荇饑建修本村祠及河隄以工代賑復罄所儲粟以食老弱之不能力作者村人

惠之

以上太原府

張明仁臨汾監生年十歲隨親避亂卽能宛曲開慰博親懽心親沒撫愛四弟尤篤地震後收養女子二人數年後訪得其父還之建義學焚借券人多其高義云

王家偉臨汾諸生性倜儻好義閭變時有至戚陷賊中挺身赴救得脫於難

王綦隆襄陵諸生弱冠值流寇攻堡督眾守禦拔面矢以返殪寇乃解去一時推其義

梁邦英襄陵人順治中以貢官至蕭縣知縣有循聲告歸出俸設義田義冢餘悉散之族里卒祀忠義

侯于楚浮山人己丑之變賊乘夜蜂擁入城縣令王墜城下負傷于楚方護母出避見之卽負令先趨至北閭村方迎母賊已追至母被殺痛哭誓殺賊以報屈於力飲恨而死

張冕曲沃武生有勇略順治戊子寇攻城營東門外冕伺間縋城下火其壘賊拔營而西乃率勇奮擊走之城得全時鹽馬賦役多沿明季之弊力言於當事革之

秦士柱曲沃人善騎射明季流寇圍其村堡率村人守禦飛矢中面拔而反射之中其渠寇乃解去時服其勇

李長華汾西諸生有膽略順治初土寇攻城率眾固守素精火器斃賊甚眾同時武生郭封伯亦屢出奇破賊王發軔者亦諸生首輸千金爲戰守具城被圍經旬卒得全咸推三人之義

鄭倬鄉甯人官兗州守周急好施嘗濟里甲金數百人德之楊鳳翀鄉甯人順治四年寇犯境鳳翀總城下力擊之城賴以安值歲荒廢產濟人全活甚眾

張汝水臨汾人好施予設崔村義渡又捐粟八百石賑饑修險道二十餘里劉遜亦以輸粟救荒授義官

劉三俊臨汾人好談忠孝事刊格言以勸人有負債鬻子者爲代償之嘗還遺金助婚嫁施茶粥爲鄉里推重荀山諸生篤於親族故舊遇有急傾囊濟之以條陳河東鹽務知名

朱良科臨汾人嘗拾還遺金夜獲偷兒識爲里中子從容慰遣終身不言其名

亢以俱臨汾人少孤與弟以份友愛特至施藥瘞骨鄉人稱之又蔣有德蔣吉人黨九成張崇祚劉光祥張崇禔張維濱郭治民救荒掩骼並多行義

白毓色臨汾諸生家中貲而好施給康熙戊寅辛丑兩次賑饑其他建義塾修橋道諸舉皆節縮衣食爲之

范潢臨汾貢生事母孝庚子辛丑歲大旱出錢粟周其鄉人又輸重金佐賑雍正丙午復代輸一族逋賦云同時王名亦以助賑輸餉稱義

王升秀襄陵歲貢曾修邑志又拾還遺金士林以清介推之許成璵洪洞貢生賑饑焚券族黨稱惠張謐居鄉多義舉由

進士官鹽城知縣有政聲

劉我義洪洞人好行其德置義田於里中以資戚友婚葬費順治丙戌旱蝗輸穀五百石賑饑嘗遊山左渡漳河有婦投水詢之則貸金贖夫罪而遺其金者卽解囊資之弟我禮亦好施嘗建社學開東山路以州同注選不仕卒

鄭師孔洪洞人道拾遺金榜示通衢得原主還之

張復隆洪洞監生歲饑與兄復昇出錢粟贖其里子藁能紹先志捐社倉穀六百石

劉充洪洞人由廩生任工部員外郎歲辛丑朱文端公軾奉命辦賑奏以從與弟勦倡捐一萬六千金粟數千石由是富紳鼓勵踴躍輸將全活無算得

旨褒嘉議敘僉事道

許奇琳洪洞監生事母甚謹辛丑歲歉捐穀賑其鄉里雍正初又以母命代完里中正賦百餘金

張大統浮山人康熙丁酉舉於鄉嘗捐修學宮及梅尾山道費至鉅萬辛丑游饑與弟選貢大綸輸銀米佐賑復煮糜哺寡人訖三年捐社會穀八百石舉孝廉方正力辭不就

張光燦浮山歲貢事繼母以孝聞焚逋券設義學里人多稱之又諸生衛子璵亦善事繼母恤災濟貧惠周同里

丁健太平監生康熙甲午歲祲出金市粟創立義倉至辛丑大饑又倡眾振濟賈漢章亦以賑饑施棺見稱鄉里

丁詔太平人兩得遺金皆還其主王效武鬻炭爲生道拾釵鈿一篋訪還之監生趙侯珍嘗輸粟賑饑亦有拾還金珠事許廷樞太平人由廩貢授中書舍人辛丑大祲有以田產求

售者收其券如數予之歲稔悉焚券聽贖鄉人戴德立祠以
祀州同劉永祿及耆民王璠趙擇並以竭貲賑饑丕著義聲
崔演太平人候選訓導家居孝友里有因貧鬻妻者出錢粟
周之令完聚煮粥哺饑並輸穀百石倡立義倉吳大有者亦
以恤族睦鄰並爲世稱

李繼學岳陽人以主簿官於浙有循聲家居割腴田供書院
膏火於西山平險途以惠行旅歲貢常弒亦好施濟嘗與其
弟錄建石渠義學里黨中有婚葬不給輒資助之

李燦曲沃人莊簡公浩元孫也順治中父儋兄棗羅禍羈京
都燦冒死陳情事得白家居倡修宗祠念寇亂未靖村堡圯
不可恃協鄉人興築己丑之變鄰村多遭焚掠所居獨完
賈鳴瑩曲沃諸生從兄某老而貧迎養之死以禮葬出金置

祭田以成父志縣有修城之議鳴瑩已病將終猶輸貲爲倡王道洽曲沃諸生事親孝撫孤甥有恩誼邑令潘重其行禮延之不一至比潘遷官去徒步祖道潘喜甚解囊琴贈之楊升秀曲沃人寄居襄樊妹適襄陽諸生王某王嘗寄金數千惟升秀知之後王與妹相繼逝無子升秀擇族子爲立嗣發所瘞金悉以畀之弟監生芝秀亦慷慨好施稱二難云辛應昌翼城諸生慷慨有氣節遊淮歸晨起放舟遇投水者救起詢之則被盜負富人金勢不欲生也傾囊付之不告姓名而去王世蔭亦諸生有友寄金爲盜劫如數還之高毓慶翼城人四世同居歲饑煮賑全活甚眾澤潞數百人立碑以志其高義

秦民瞻翼城諸生天性孝友父被誣挺身代之事獲伸與弟

析產讓肥取瘠尤慷慨喜任事修石門坡黃家舖坡給孤貧
花布行人茶湯掩骼漏澤多義行子鏡舉人亦有父風
張奎璧郡文學事繼母孝撫二姪同居三十年無私財妻多
病姪爲謀娶妾與至家矣以義女嫁之歲饑出粟活里人三
十餘家爲完逋賦

王楮翼城人恤貧濟急常若不及所請僕婢時折券放還辛
丑薦饑散粟百餘石復領官帑糴米代賑不足以已貲補之
賀晏臨汾人詹事府主簿乾隆中嘗出粟賑饑邑中義舉若
書院社倉靡不殫力捐資樂爲倡始嘉慶元年逢千叟宴
盛典以年屆七十獲與焉

王永盛臨汾人性孝友恤貧濟困孜孜不倦乾隆己酉歲饑
出藏粟數百石賑之嘉慶十八年又饑賑如故祀孝義祠

范永祚臨汾人舉孝廉方正敦篤好義所焚積券至三千金
劉克順臨汾歲貢乾隆丙午歲歉村人艱於籽種徧給之不
責償後官廣平主簿有惠稱

劉淑任臨汾人官蘄州知州嘗代輸逋賦萬金民惠之居家
敦友愛建社學設義冢郡有大役必力程其事

王升秀襄陵歲貢乾隆中與修縣志嘗得遺金守候失者還
之清介之操士林雅重

劉衷洪洞人事母孝歲歉體母意以粟千石贍族免佃租
至二萬餘金以輸餉議敘太僕寺少卿從子光晉官員外郎
亦多義舉乾隆丁卯南省賑務與山右銅政並興輸金十餘
萬賞加光祿寺少卿銜

劉方溥洪洞人官南康知府以清介著家居勇於爲善城南

澗河橋護城石隄諸鉅工皆竭力成之屢輸軍餉並本省銅
勛獎敘悉辭不受士論高之同族西甯道光昱候選道大慧
都察院都事大愆並急公好義惠周里黨

劉克昌洪洞人用鹽莢致富事親以孝聞篤於友誼嘗割腴
田以贍宗族居鄉尤多義舉乾隆甲午薦饑購米數千石以
賑貧乏嘉慶乙丑丙寅災祲頻仍復捐銀米繼賑大興工役
鄰邑饑民皆得傭力就食兩年中費金幾及十萬其在東省
辦公拯災所輸金亦稱是遠近德之嘗再迎

鑾輿入都慶祝與嘉慶元年千叟宴並荷

優資皆異數也

李曰昇潯山歲貢事親孝居恒利濟爲懷施藥餅修橋道孜
孜不倦縣令某行里催法頗擾民力爭罷之後官孝義訓導

陝國勝浮山人性孝友五世同居乾隆間歲歉凡乏食者皆貸以粟貧不能償者則焚其券年九十六無疾而逝

李學貴太平人乾隆戊辰出千金賑饑嘗捐設義學義倉以時平治道路

谷雲陞太平人性篤天顯友愛昆季家居建橋通衢以利行旅救急卹貧義舉甚眾官戶部佐度支有聲

孫宗賢太平人授職州同孝行義舉爲宗黨所推嘗欲設賓興經費未及舉行而卒子有禮卒成其志

張輯候補知府丁烱諸生並太平人與同縣賈乃倉師積德李英乾隆中歲歉先後各捐錢粟竭力振濟諸生巨晉瑄嘗焚積券李桂萊傭也道拾百金訪還其人

左時泰岳陽人監生以信義爲鄉里推服有以年饑鬻妻及

子者爲代償鬻值俾完聚

許翰傑曲沃諸生事親至孝幼師許如玉奸民郭忠傑倡亂素仇如玉思報之詢翰傑以如玉所在脅以白刃終不答乃免壬申大饑出穀數十石以賑之

行思祿文魁吾並曲沃人皆於途中拾得重金還其人

趙瑋曲沃監生無子買一妾入門而啼問之曰有幼子在瑋曰吾無子何反析人子母耶卽送還不索值

李善積事繼母以孝聞嘗服賈關西獲客遺金訪還之歲饑召戚黨咸就食無德色焉

張行五曲沃諸生壬申大饑出米散給村人子惟忠亦諸生嘗焚積券罷居謙者亦於壬申施米賑饑

上官澍翼城人性豪邁喜交遊嘗出金建城外二石橋歲饑

煮糜以食餓者並出藏粟減直以市人比以感德以父陰選中書不就築鏡園吟詠爲娛著有蔗園詩集

閩國琮鄉甯人家酷貧路拾遺銀守候其人還之

鄭孝先鄉甯監生事嗣母得歡心推產讓兄歲祿賑饑輸粟至千石邑有營建必力程其事又設立義塾延師教族里子弟所焚逋券約三千緡以孝義旌

宋萱臨汾諸生品望爲鄉閭所推里有貧而鬻其女者贖以歸長爲相攸嫁之教授後進一本躬行士林稱道不衰

喬萬春洪洞人家饒於財歲饑代輸官賦千餘金所居村西舊多水田渠壞以工鉅久弗修出貲獨力經營越二年乃就村人利賴嘗獲遺鏹於道訪還之

喬億傑洪洞監生嘗董理義倉出納惟期實惠及人恒出已

粟補缺易其紅朽者嘉慶間歲比不登倡捐粟二千餘石並興工役代賑其他義舉甚多年七十九無疾而逝

孔毓齋洪洞人嘉慶間出粟五百石賑饑同時監生鄭鐸申言謬亦盡散所藏以救鄉里

李景膺太平人事繼母以孝聞乾隆嘉慶間屢饑出金濟貧同時李興官亦於乙丑捐賑又耆民牛奎鑾以焚券稱義行日昂曲沃人授職吏目丙寅歲饑方客山左聞之寄金一千助賑嘗買一婢詢知爲儒家女立反其券資以金爲生計武生辛聯芳亦喜施予旣以金輸官助賑復倡率鄉人各保本村興修義學割腴田以資膏火文居仁者嘗賑粟數百石晚習醫恆儲藥餌以救人疾

上官勳翼城人性孝友樂施予扶困濟危傾囊無少吝官

楚雄府同知亦有惠績

田克辰臨汾監生孫被鄰車所傷歎曰誤也竟不較或盜其禾遇之急潛避而遣人諭盜者以他事引之去人稱長者高文相者亦有義聲尤篤於師友之誼

王佐臨汾諸生道拾遺金訪還之

吳萬清襄陵武生性磊落嘗服賈折閱家計日窘而所存逋券尙二千餘緡皆貧無能償悉取焚之子勇成豐中以軍功官遊擊家居嘗興書院建立義學秀別見忠烈

薛清月洪洞人道光丙午旱饑竭力資救村無流亡將卒遣命子孫歲餘粟三十石別儲備荒如法行之其後咸豐庚申光緒乙丑皆積至數百石兩值災祲村人皆賴以濟

王克杰洪洞人家僅中貧而喜推解昆季久析居遇有貧乏

必推產濟之其他焚券恤貧散粟救饑里人皆樂道之而州同劉汝苞監生范天祐皆周急扶困雖客中不吝解囊諸生劉尹卿後官邳州知州亦以急公好義聞

劉鍾沆洪洞諸生性耿介家貧課徒自給光緒丁丑大祲累日斷炊或憫其窮饋以食不受竟餓死鄭萬元家世農劉邦進買人子皆狷介自喜非其力不食歲饑並投繯死

張致中浮山人道光庚寅道拾千金訪還其人縣令以聞大吏匾旌其閭

李汝和浮山人克敦孝友親黨中有以匱乏告者推解不少客前令某嘗負千金罷官貧不能歸取券焚之復資助其辦裝由附貢官知縣

邢俊岳陽人議敘千總事親克孝嘗焚逋券累千金

裴奉鐸曲沃人與兄奉鈞相友愛均以好施稱道光丁未出粟賑濟村無飢人邑中凡有公舉多資匡勩官潯州府通判遭憂歸

宋洪業曲沃人領咸豐壬子解額性廉介重然諾敦意氣足跡未嘗履公門前令龍重其行延之主講書院力辭不就楊珠樹鄉甯附貢授職理問性長厚親黨有急不吝推解遇邑中大舉必竭力襄贊丁戊荐饑出粟助賑盡蠲佃租計口授食待以舉火者十餘村

閻時康鄉甯監生事繼母及兄甚謹因母患瘍遂精於醫恒施藥濟人慷慨向氣遇事敢任軍興奉檄團練多倚以辦嘗與邑舉人王建極倡設賓興經費俾寒畯皆有觀光之望人尤惠之其他修學建橋義舉甚多

以上平陽府

楊選劉榮並蒲州人以拾還遺金稱義

陳所思臨晉人家貧鬻炭嘗道獲一騎金帛盈裝訪還其主
堅不受謝遇歲荒乃向之貸穀百餘石分賑村人孟軍門勦
賊時有諸生姚啟英及弟冠英被仇誣陷將就戮所思仗義
公言至受刑不變軍門嘉焉爲釋二生而坐誣者同縣謝廷
輔亦以還金焚券稱義

喬巖猗氏諸生道拾遺金訪還之時稱長者

石若磷虞鄉人授職州同有以逋賦鬻妻者卽出金代償之
王子穀猗氏諸生文行爲一時推重康熙壬申荐饑散粟施
粥惠周鄉里曲沃賈舍人鳴璽以貸賑告卽輦穀十餘車贈
之一時稱爲豪舉子濬登戊辰進士侍母病積勞成疾卒濬
濤並舉於鄉

陳洪疇猗氏舉人康熙中清查鹽丁有司希上官意虛增名籍洪疇爭之不得會友人許給諫承宣自秦典試過晉爲陳賠累之苦許據以上聞由是奉部檄核減得豁除三之二鹽戶大蘇羣走謝洪疇曰吾憐桑梓重困豈市惠耶拒弗見

陳毓秀猗氏人父國泰諸生以孝友稱毓秀事繼母得歡心善處族黨歲饑出錢粟濟貧不足則鬻畜牧質田產以繼里人感德稱爲佛子由歲貢任平魯訓導以老乞歸子基命亦有行誼三世同居無間言孫綸綽並舉進士

衛旣翕猗氏歲貢康熙乙卯間倡製文廟祭器三百具辛未複輸賑數百石濟親友亦稱是粟不繼復傾貲二千餘金分給之三日立盡

邵國昇猗氏人慷慨好義時地糧多累里甲聚訟數年不決

國昇捐金募民開墾荒蕪復請於縣令陳免稅二年鑿井築垣創立陳建莊又舊以富民充倉吏里胥開報多破產求脫縣令高議閩邑倩一名至今稱便國昇實爲之倡云

荆之屏猗氏諸生以意氣自豪焚券千餘紙一時惠之

王自立榮河人康熙甲辰連歲旱荒出粟濟窮民又代完村中正賦百餘金鄉人德之

潘宗仁榮河人康熙辛未歲大歉出積粟以濟有逋負不能償者皆焚其券潘培桐亦於辛丑散粟焚券嘗赴鄉甯道拾百餘金覓還其人

崔效林永濟人雍正七年有高世澤者路遺金珠等物甚厚拾而還之高願酬以半堅不納鄉人義之聞諸朝旌獎之張茂天臨晉人俠勇善射嘗適兖州途遇安邑李某裝千金

爲盜劫茂天彎弓直前盜棄金而逸李分其半酬之笑曰吾豈望報者哉且盜奪子金而吾奪之盜是亦盜也不顧而去麻昌宗虞鄉諸生佃人李某負租甚巨某死妻將嫁昌宗曰若有子非願嫁者租不能償細事耳因取券焚之妻感其意遂矢志撫孤朱時逢者有佃人負租不能償攜其妹來請爲婢爲惻然立折券遣歸

賈潮玉虞鄉人有長者稱乾隆戊辰歲稔出粟賑濟鄉里張廣虞鄉人拾遺金訪還其主歲恒施茶湯舍藥餌以濟人王廷科榮河人戊辰歲大歉出積粟二百餘石賑其村人同時王永澤及弟永潤亦賑救多人

薛立保牛金榮並榮河人先後道獲重金候其主不得俱聞於官薛故飯牛者人尤難之又賈人李朝棟者以焚券稱義

山陰縣志卷一 風俗 三
潘培棠榮河人以無子買妾李氏方寢妾泣不止詢之乃呂氏媳姑老夫病家無升斗僞爲女而轉鬻者立遣別寢次日送還不索值更給五十金令養姑醫夫

潘升庸榮河監生篤於親黨家僅中貲而利濟爲懷嘗葺宗祠修北坡車路妹家稱貸踰千金臨終妹至取券焚之

景繼堯永濟人嘉慶十年歲歉代完其里正賦七百餘金

胡慷永濟監生拾遺金追還其人家六世同爨居鄉多風義周大受永濟人道光丙午歲饑出粟千石倡賑

潘源榮河人嘉慶乙丑薦饑出粟賑其鄉里

楊郁春荷氏諸生孝友稱於鄉里道光丙午歲饑出粟以濟貧乏村無流亡有負債不能償者取焚其券

李映淮荷氏人敦篤孝友好義急公邑中營建几有裨風教

者皆樂爲經始丙午大禡出粟三百石以濟戚里同治丁卯捐賑如前友人貧者歲必量給歷數十年不倦亦無德色張映斗猗氏監生服賈起家喜恤貧趨急族中窮老無依者必收養之友人某負債千金人無償取券焚之

高清暢榮河諸生家貧教授鄉里性狷潔耿耿自信光緒大禡生徒多散恥於乞憐偕其妻具衣冠投汾水死

以上蒲州府

李長庚長治人貿易樊口逢潞城陳度於市乞食詢知其父殉難廬陵往尋骸狀厚贈之同時張皇政亦有義行獲旌孫家正屯留諸生家貧盡孝操行見稱鄉里舅氏乏嗣置田六畝爲祭掃之資

楊曜屯留人弟暄武舉嘗與鞏陽城土寇姜壤之亂大軍抵太原曜應募往爲前驅平寇及逆賊王家蔭等寇澤潞與弟

暄復迎大軍進剿事平授長山縣丞卒於官

崔洪憲襄垣諸生順治末歲大歉人民流離錢糧脫累洪憲爲捐金數百代輸之知縣張區旌其義

李鼎黃黎城諸生性孝友好施凡姻族喪葬無藉者咸爲資助庚辰辛巳年凶復疫賑饑瘞殮不惜物力姜逆之變葺山砦保障一方庚戌迄壬子歲疊荒設廠施粥活人甚多學宮值兵燹久圯罄囊重修以功貢授州同未仕卒

楊振豪壺關人順治年貢捐資獨修學宮

王體元長治附貢好施給置義冢刊勒埋嬰兒說鄉俗爲變而諸生朱蔭昌亦捐地以掩骼骸

庾掄秀長治監生康熙壬寅荐饑賑粟一千餘石又設義學課其村之子弟同時貢生孫宣哲王烈縣民馮雙軒並各輸

粟賑其鄉里宣哲尤多義舉所居村當南北通衢道險阻出重貲購民田別闢新途凡里中社學義園皆獨力成之王自重長治人於西街王朝宰肆前拾遺金疑卽肆中物立與之朝宰愕然不受因同鳴於官待原主給還又劉三者嘗拾得珠約值百金訪其人還之

康九如長子廩生友死貧不能葬爲之殮嘗拾還遺金平順人有逋賦者將鬻其女出資代輸之

馬顯祖吳琦並長子人壬寅荐饑均出粟賑其鄉里

馮宗堯屯留人歲辛丑饑設粥以食餓者明年出粟續賑於宗族尤加篤厚嘗代輸正賦婚嫁愆期輒出資助之

段藍田屯留諸生恤孤濟困孜孜不倦有九歲子吳最鍾愛爲兄子擠入井中雖甚悲慟念兄老不與校兄撻其子欲置

之死急往解救一時皆推其義

劉瑤襄垣人嘗拾還遺金

米士和襄垣人出粟賑饑與郝進都崔鍾瑤均以好施稱
張必達潞城人遇水雹傷稼輒出雜糧籽種散給鄉里辛丑
壬寅薦饑州同武全才及梁得京並出粟數百石助賑

趙文銳潞城人居家孝友壬寅大祲罄所積並糶糶散之村
中百餘家均賴以濟出金鑿池以便汲道子泰能繼其志
李芳黃黎城諸生事母孝嘗建家祠置祭田歲時少長咸集
有古義門風性喜周急丞某罷官客死育其孤又嘗挈資走
千里歸亡友之骨以功貢任濟南通判居官以平恕稱

王錫琳壺關監生倡輸義倉穀數百石有司奏獎之

王汝爲壺關人康熙中嘗出粟救饑子金紫金綬當乾隆已

卯大旱徧賑鄉里冬寒又施絺衣人稱世德

路躋垣平順歲貢嘗倡修文廟義舉甚眾

楊廷棟長治監生居家孝友尙樸儉而見義勇爲乾隆辛未壬申歲祔施棺百餘具好讀史時摘錄以訓子姪

賈宗彥長治人乾隆間大饑輸粟賑其鄉明年復代償逋賦每冬則施衣食以濟貧者著有西河家訓同縣申大元亦屢出粟賑饑

徐瑾長子吏員已卯歲祔分金散粟以濟里黨有鬻妻子者爲贖歸積券無償者悉燬之楊天培事親孝亦嘗賑饑焚券王鷹揚長子武生已卯王子兩次出粟按戶賑給
陳玉薪長子人途次拾遺鏹六百餘金策馬追還之
李天相屯留人與附貢馮沂並急公尙義爲鄉里推重

李生正襄垣人嘗辦穀賑饑義舉甚多乾隆丙寅鄉遭水災生正已卒其妻邢氏捐粟九十餘石按戶施救克繼夫志韓茂生襄垣吏員張佐李均並耆民俱好施子翰資辦公前後縣令皆匾旌其門

吳楚潞城監生歲丙寅出粟賑饑施衣庇寒又庚辰大祲有陳筠者奉母趙氏命出粟周給同里

趙淵潞城人家貧不能自給一日出賃道拾重金辨爲里甲趙某所遺趙方以失官鑑覓死急歸叩門還之

李維本潞城人居鄉有行誼年老乏嗣乾隆乙巳避邯鄲饑歲饑有攜幼子並妻求鬻者畀以五十金已盡券矣婦與夫相持痛哭維本惻然立折券卽以原金贈之是歲妻忽妊旣而一舉兩男維本壽至百餘歲乃卒兩男鬢已蒼矣

申邳隆潞城諸生議敘主簿已卯歲薦饑出粟徧賑迄丁酉
戊戌災禱相仍周恤如前子克崇亦有行義嘗設義學建宗
祠又牛五芝平順人亦於己卯發粟救饑期年不懈

苗德昌潞城人力田起家乾隆甲申大旱秋無禾民困追呼
德昌爲出資代完一村正賦明年中稔村人爭來償謝弗受
其後庚子歲饑有田繼業者方爲甲長所司一里錢糧獨身
任之盡產輸官不復追償縣令高其義匾旌之

李維黎城監生性耿介尙義嘗施粥救饑募金修學乾隆初
以年踰九十給八品頂帶

靳尙瑞黎城人歲饑倡義勸賑又自施粥糜以食餓者中雍
正甲辰舉人已酉聘充陝西鄉試同考官時

詔舉賢良方正有司以尙瑞應牒已行矣歸以白母母年高

有難色卽詣縣力辭追牒還後選忻州學正未仕卒

高搆謙黎城歲貢少孤事繼母以孝稱讀書通醫性好施予
嘗出粟俸朱子社倉法視歲豐歉準出入與村人共計盈餘
不十年而家給人足所著有律呂圖考朱陸異同辨等書
闕呈傑壺關人雍正初捐貲賑饑同時陳伏和者節婦趙氏
子家不富而恥於自私傾困倒廩以救鄉里

靳登鼂長治諸生居家以友愛聞戚黨中孀孤無依者撫恤
周摯嘉慶癸丑歲饑捐貲賑其鄉弟登瀛子高並諸生能繼
其行嘗立惜字育嬰諸會遇歲歉設法振濟

靳復性長治人耿直尙義嘉慶乙丑歲祲出粟徧貸鄉里復
偕同事設粥廠歷半年全活八百餘人家韓店鎮有屠某椎
牛爲奸禁之不可聞於官按如律屠憾甚偵復性有違行與

其黨要諸路將甘心焉復性既就道馬不前鞭之則逸而東
乃縱轡趨別道行屠訝其不至他日探得其故乃以實告曰
是神明所阿護也吾儕小人何敢再犯相率他徙

吳廷桂潞城歲貢癸酉歲歉出粟救饑次年秋乃已

甄建功潞城賈人子也道拾票錢三百餘緡訪其主還之

王鳳舞壺關人授職同知生平重然諾以周急恤貧爲己任
歲歉捐貲賑濟鄉里賴之又千總王運嘉慶元年

恩與千叟宴王廷杰授職遊擊並有義聲

胡柏齡長治人授職中書事孀母以孝稱嘗建宗祠置祭田
設義塾於善舉孜孜不倦著有讀史備忘十卷

李炳章長治諸生授徒不計脩脯因其資而造就之鄉黨高
其行家故有貨肆歲饑盡輸其值以賑而貢生馮潤諸生郭

汝瑚並以歲荒助賑爲鄉人稱頌

牛世堯長治歲貢少以推產讓兄知名子諸生俊篤於師友從子牧亦諸生嘗建西火鎮文廟並輸金備歲修及春秋祀宋良弼長治耆民也道光中賈於洛陽值歲饑土人多鬻產他徙因以賤值得膏腴田數百畝越兩年歲大熟悉召原主出券聽其取贖一時頌德

靳九鼎諸生王作棟貢生陳于時監生並長治人急公好義又秦均李鍵皆以抗直喜推解見重鄉里

苗文錦長子增生道光乙未歲歉出粟賑之

李馥長子諸生家中貲而好義丹朱嶺峻險行旅苦之與弟邵出貲大修數十里悉爲坦途

呼鳴崙屯留歲貢行義爲鄉黨所欽有爭事皆就質焉不興

訟者數十年又貢生苗治禮武生李晉並以好義急公稱
李將出襄垣人家七世同居恤孤濟貧鄉人咸以老善人稱
之附貢趙映奎亦好施邑有大役竭力程其事

李恆五潞城人買於山東道拾遺金訪還之買國珍家世服
蠶前後焚券計萬七千餘緡

楊潔壺關人嘗遊南陽拾遺遺金大買某攜重貲求寄潔以
素昧生平請署券某曰君一諾足矣奚以券爲竟置之去
常道長治監生慷慨尙氣節道光咸豐間薦饑竭力拯濟因
母病習醫母愈業亦精歲施藥餌爲常

李馨長治人家貧以醫爲業性耿介不能隨時俯仰咸豐丁
巳歲祿絕糧杜門餓死

李鐸長治諸生家中落而喜趨人之急友某親死傾貲助葬

里有鬻子女者百計贖還之咸豐中以團防功議敘六品
羅永祺長治諸生成豐中粵逆犯境率練勇登陴固守申明
約束民勇相安練餉不給倡眾助輸甚爲當事倚賴年踰八
十卒著有齊家格言養心篇諸書

李宗昉長治廩生與兄聚垣並敦孝友樂施濟光緒丁丑大
祿宗昉先卒聚垣出資助賑所瘞道殣以千百計同時武生
常士元從九年錫祿並輸粟賑其鄉里

常澄心長子諸生豪爽有膽略咸豐三年髮逆告警人皆走
避官軍駐境無食可市澄心率村人設飯場十餘處以贍之
李雲峰長子人起家商賈三次賑饑全活多人

李莊屯留監生急公義喜下士自奉布衣疏食月必設粥二
次恤養窮黎同時諸生楊國賓及李芳郝步瀛並有義聲

李羣法壹閭農家子也丁丑戊寅大祲出資倡眾爲掩骼之舉所瘞以千百計

以上潯安府

呂謙汾陽人好施贖鬻妻字孤兒周急濟困義聲甚著事親亦曲盡孝道母九十而沒謙已七十矣居喪哀毀踰禮

張瑛汾陽人家豐於財以好施聞歲饑輸金助賑並以賤值得田千畝明年大熟徧榜各村願贖者聽而旬盡贖去咸稱長者姜瓖之變盜賊蜂起所居西官村無堡寨人將逃避瑛爲畫守禦策眾從之家故有礮樓乃環村爲溝封儲村中財物於樓俄而賊大至眾登樓固守一賊方倨坐左右指揮瑛急趣有力者舉石礮投擊中之立斃乃其渠魁也餘賊怒攻之急樓上瓦石亂下不得近稍稍去瑛曰可以出而逐之矣相與持械大呼擊鬪賊奔潰多墜溝死時瑛年甫十九遠

近村被殘破不一而其村獨完聚如常人服其智勇後年九十有一無疾卒季子乃擢亦以行義重於鄉

張三樂平遙監生順治初土賊李虎等肆劫掠園所居之段村將潰賊忽揚言予我千金卽罷攻三樂聞之曰堡中生聚數百家如得全千金何惜括私財如數畀之賊引去未幾其黨謀還攻首者不可曰人以信義遇我背之不祥戒勿犯董爾型介休人家素饒順治中以捐修文廟授訓導職子正紳貢生讀書務踐行著有性理輯要諸書遇歲饑率先捐賑鄉人多德之康熙中祀入鄉賢

趙禕臨縣諸生慷慨有智略明季流賊陷城四出劫掠禕負父走避途遇賊冒死力鬪賊壯而釋之會巡撫許鼎臣以師至芻餉不繼禕出粟豆草束以犒師許義之辟爲參謀以親

老辭壬午大祲出粟賑鄉里及闖賊東渡僞將高一功來犯以縣人拒命欲屠城禕毅然入賊營曉以利害遂拔營去宋騰高臨縣人明季流賊之亂出貲督鄉人立寨山嶺設法固守賊無敢犯孫國臣濟饑恤貧亦有祖風

王在沼臨縣諸生素以多力聞明季賊蠭起屢爲所殲賊憤甚乘不備糾黨火其居在沼知不免手刃婦女十八口自投火中賊挽之出脅以刃大罵不屈首者壯其烈釋之去及姜壤之變陝賊平德渡河陷城在沼率鄉人結寨固守賊相戒勿收犯亂定值庚寅大祲括所藏粟千餘石盡散之

王家棟甯鄉人順治三年以縣境地荒丁殘重爲民累往來呼籲實情得達豁免荒閒地糧四千五百十七石有奇絕丁差銀二千三百三十餘兩眾義之勒石紀其事

趙曰昌汾陽人康熙乙卯舉於鄉性儉而好施子親族故舊待舉火者恆數十家庚子辛丑荐饑捐銀三千助賑

李曰耀汾陽人蓄願以千金修堡事未行因歲饑遂以散賜村人子忠森孝森節森卒營建成父志康熙辛丑以捐賑獲題旌又諸生宋乾及馮芳猷各出金修其村堡以衛鄉里田周汾陽人康熙辛丑歲饑括家財得六千金並以賑貧朱交端公軾方辦賑高其義造廬見之蒙特薦雍正中授戶部雲南司郎中三年以疾歸性恬雅好讀書工詩文所著有郁青樓集

馬權介休人官至陝西鹽驛道性豪邁篤於交遊賓客最勝往來投贈動輒千金時比之陳孟公云子惠愚並舉於鄉梁嶸介休人有毘陵蔣姓者以醫來與之善蔣病死棺斂之

籍遺金藏諸棺其家無奔喪者乃跋涉三千餘里送還毘陵
出所籍遺金歸其妻子毘陵人多作詩美之而王國璽嘗於
逆旅得遺金急追還之客間積數千金父母已沒諸叔分居
久皆貧乏迎之同爨郝顯智亦以拾遺遺金著義聲

劉世昌介休諸生庚子辛丑間比歲荒歉先後出粟三千石
金二千以賑所居鄰沙河廝渠禦患復資灌漑鄉人賴之董
協甯亦諸生與從兄訓導協徵並於康熙末發粟濟貧而主
簿曹建經員外喬甲第皆出金築隄汾側以遏水患劉澤洪
世昌子也復於雍正乙卯施金賑饑有鬻婦者贖歸之

董深介休人妻死年甫踰冠終身不復娶子居正有孝行
郝顯智介休人遊壽陽於旅次獲重金還之遺者一時稱其
義

王元儒孝義人康熙丁丑歲祲出粟濟貧及壬寅薦饑元儒
召村中丁壯人給推挽車一具各舁以貲令往崞縣市米歸
售所獲餘粟人自爲生老弱者計口授食費千餘金而活人
亦千計子定位亦有父風乾隆中村人王某以災年鬻妻贖
歸之而諸生梁開國者亦於辛丑歲令其村人輦粟代州各
助以資家人嘗以病牛取價開國知之急贖還

田丕黼孝義人辛丑大饑待以舉火者數百家子繼學貢生
行善益力首捐義倉創立禁約村中遵之數十年無聚博爲
非者族人某以病鬻妻贖之終身修西山道以便行旅乾隆
丁丑後連經荒歉孫裕樞等設法振救厯三年村無流亡
于廷翼永甯人康熙乙亥迄丁丑連歲荒歉宗族七百餘口
月給以錢里黨貧者亦量爲振貸全活甚眾

陳三錫永甯人授職州判康熙間歲大祲念北邊爲產穀之區州磧口當大河衝遂設肆招商轉運出是糧艘鱗集人得就市謀生無殍餓之虞磧口爲巨鎮繁富實始於三錫云馬祿甯鄉人辛丑大饑施穀一千餘石以賑八村

王敏汾陽武生性廉介歲饑斷炊二日弟手金至請易粟敏正色責其干人令持去有憫其困者欲贈之金坐竟日不敢出諸袖遠近咸呼廉士足不履官府遇友人急難輒抗辭申救老無子一婢頗有姿或勸納爲妾不可尋有以重金來購者恥因婢取財亦不許爲擇少年嫁之嘗赴省旅舍中遇一稚子察知爲被誘者走百里送歸其家則孀婦所撫孤也重酬之弗受曰吾憐其幼無依耳何謝爲年踰七十卒

曹曰英汾陽諸生曾祖朝仕有隱德明季嘗遇異人授黃白

術終不一試臨終謂其子曰吾得異人術非不知可利子孫然遺之以利何如遺之以正乎生平敦篤內行事母孝母有中表姊妹嫠老無依迎養之終其身居鄉務爲退讓好施予有負之者亦未嘗與較同鄉王敏貧不受人一錢獨與曰英善歲餽之則受曰此非盜泉也雍正中郡人苦鹽商之橫倡士民言於當事請均鹽稅於糧而罷商事得行至今便之程恂平遙人授職吏目家居孝友雍睦丁丑歲饑施粟濟窮資養甚眾乾隆己卯賑饑如前時稱盛德

冀儼平遙人性篤天顯好交遊重然諾婚葬不給時傾囊助之康熙末大祲領借倉穀以給村民賴以全活者百餘家次歲獨出息還倉秦人許某以武舉計偕入都喪其資斧聞儼名就見之卽慨贈五十金許後官至提鎮屢遣使迎儼謝不

往

曹武棟介休人乾隆己卯設廠煮粥以哺飢民婦孺及癘疾者別給以米一時惠之善書兼工詩丙午與千叟宴獻六言詩甚蒙

嘉獎又梁飛議敘主簿亦與千叟宴事親孝居鄉遇興建賑濟諸舉竭力資助而知府張仁遊擊李日暹監生溫馥與任帝武郭桐喬定國宋邦侯郭淇並嘗以賑餽稱義

宋廷英介休人嘗置義冢睦於宗族貧者皆資其婚葬出重金修平定驛路以惠行旅

范毓積介休人父三拔見鄉賢康熙中官辦銅鉛同事六人有王某者虧帑八十三萬旣死毓積謂四人曰諸君與王曰事奢靡今所虧帑金獨委之重負死友何益惟我問而已乃

按期如額爲賠補雍正四年西征任轉運敘功授太僕卿兄
毓馨諸生嘗出金賑饑有隱德弟毓禪佐辦銅運餉以軍功
授布政司參政謁選聞父病急歸侍居喪以毀卒

劉洪澤介休人授職員外郎母老不仕鄉人有鬻妻者代償
其值令完聚雍正中饑輸金助賑縣人董協甯者亦嘗捐米
以給餓者力復土鹽以便民食

梁璫孝義諸生行素廉潔一日於路見遺金拾而訪還其人
雍正七年事聞準貢太學加訓導職銜旌之

辛應昌永甯人雍正中官永明桃川市巡檢有惠政卒於官
謠民祠祀之素敦孝友家貧而喜趨人急里居時有不能棺
斂者其子哭於道亟歸視無二所有謀諸婦出妝奩以與

王邦選汾陽人嘗出資設義學鑿渠引汾文二水資村人灌

既乾隆己卯庚辰捐米麥八百餘石助賑

任元直汾陽人事親孝篤於友誼舅氏沒孤幼經紀其家數十年人無閒言貢生呂文魁舉人呂經並敦內行有義聲

曹延齡汾陽人官平谷典史嘗出都道遇馳馬者倉皇趨避察其狀知爲盜追及呵之曰鼠子何敢攘吾物也盜駭然舍裝而遁發之獲金八百衣裘數襲乃趨止逆旅候失者物色俄有代州馮某狼狽至詰所失皆合立還之其後有郭璽榮張鳳耀武敏政趙任周紹並以拾還遺金爲鄉人稱道

侯敏汾陽監生事母篤孝撫孤姪如己子乾隆中汾水東徙出金築堰以衛鄉里復濬渠引文峪水灌溉村田嘉慶甲子歲穀煮粥哺飢咸稱其惠同縣州同李蒼醫學張德威監生劉廷錄任開運賈生瑋及張周於修橋治道建隄築堡諸義

舉多輸金樂程其事云

李亨翠平遙監生好施予周恤貧孀收養棄嬰贖還鬻女設義學以教里中子弟子天林亦歲施藥濟人與同縣安拱極闕治並以義稱

宋燦平遙人與弟琅相友愛風義素著乾隆三十二年汾水陡漲民屋漂湮兄弟竭力拯救被災者皆棲於其家分給餐煖男女數百賴以保全焉

梁佐譽介休人乾隆癸卯舉人居鄉遇義舉輒量力輸資悉心籌畫東關義學卽所振興鄉里中以事相質必諄諄開導以息爭訟官內閣中書引疾歸

郭正璋介休人官西城指揮乾隆己卯庚辰歲薦饑與從弟鎮璵等出金四千粟六百以濟貧民

張國珍介休人性孝友歲饑出粟賑濟者數次嘗代輸錢糧積逋並修村堡費皆不貲所論著有易書評解四柏齋文集以歲貢官太原府訓導卒於官

郭璟孝義人乾隆庚申出粟賑饑又輸穀倡建義倉及辛卯大祲其妻田氏與子連培復出金繼賑按口分給至次年麥秋乃止從弟玠貢生與其子州同連疆亦兩次助賑以時平治道途鄉人皆稱其義

梁治國王希旦並孝義諸生俱孝友好施子鄉里多德之縣民張世醕亦以行義爲里黨推服

薛五絨臨縣人少爲武生訓蒙於汾陽偶爲士人所輕卽辭去力學補弟子員及省試見闈中搜檢曰人不自知恥致防如賊待如囚吾羞入矣竟絕意進取其狷如此讀書一土穴

中三十年尤好易沒發其篋多宋儒書

趙精臨縣人力農起家積穀數百石窖藏之適歲荒盡出以賑鄰村賴以全活者甚多子承基官南城兵馬指揮使

侯國泰臨縣人家貧力作道拾遺金六百還其主富商某聞其義畀千金令貿易國泰持往北口值歲祲塞外大寒見無衣者買羊裘給之未幾金盡某嘉其志復與千金卒以營販起家劉士喜者亦嘗還人遺金歲饑有鬻子者贖歸之

侯法堯臨縣人乾隆戊午癸卯兩次賑饑賴存活者以萬數孫立志亦周急濟貧有祖風

任灝永甯人操行甚高州守謝汝霖聞其賢願一見不可得情究醫術多奇效或酬以金卻不受

王彥孔永甯歲貢授陽高訓導有學行濬渠引離石水灌所

居穆村田八百餘畝村人爲建祠勒石志之

龐完貞甯鄉人性孝友爲里黨推重周恤孤弱賴以成婚娶者四十餘家又蘇霧及弟成皆以好施爲鄉里稱道

李師程汾陽人授職州同內行敦摯乙丑丙寅薦饑散賑里門子寶元遊擊亦有行誼同時千總李殿英貢主郝時中並於災歲輸粟濟貧爲鄉里稱頌

姚鍾山汾陽人敦名義好施予至老不倦嘗出金營築村堡待詔任承繼及王大義亦皆捐修所居堡牆以資捍衛

呂文玖汾陽人喜周急有以貧鬻妻子者皆予錢贖還縣令署區旌其義又諸生趙宜均嘗拾金珠待遺者還之

張瑛平遙人嘉慶年饑賑米千餘石又鄧學文以焚券稱義侯配金平遙舉人貌端嚴人不敢犯遇有善舉必竭力成之

建社倉以備荒歉立義學以訓村蒙厯神池靈邱訓導有賢聲

侯爲龍介休人父爵官京師有清鯁稱爲龍事親孝利濟爲懷遇地方事有裨民生及文教者竭力成之侯錄其同族也性抗爽嘗遊津門遇歲荒傾囊賑之嘉慶元年與千叟宴馬震介休人通政司知事少時父沒於滇徒步扶柩歸捐貲建張蘭書院乾隆五十三年饑盡出其粟以賑嘉慶初舉孝廉方正

李觀光介休人敦篤內行嘉慶乙丑出粟賑饑明年復興工築橋通衢貧民傭力皆就食焉遠近頌之卒祀孝義同時侯選道張企儼通判田永豐並輸金濟貧力保鄉里

李三升介休人父本誠嘗建社學置漏澤三升承父志恢宏

前休尤多義舉道光中祀孝義祠

冀國定介休人授職布政司經歷嘉慶乙丑薦饑發粟濟貧道光初輸萬金大修貢院士林惠之于以正運同能承其志光緒丁丑偕其昆季出金六萬助賑鄉人之待以舉火者無算焉尋卒父子並祀忠義祠

張熊詔孝義人嘉慶戊午舉於鄉官至內閣侍讀引疾歸道光癸巳歲祿施錢米振救保全甚眾好學工書卽家設文社汲引後進一時俊彥多從之遊子鎮南見鄉賢

趙朝宰孝義人授職理問與弟千總朝聘以友愛稱居鄉多義舉光緒中並旌入祠朝聘子麟書廩生擢孝廉方正

李立倫汾陽人醕構喜施道光壬辰歲祿捐米散賑歷三月多所全活武殿儀授職同知亦於道光咸豐間兩次賑饑

李二真汾陽貢生工書精於賞鑑待姊姪曲盡恩誼咸豐中大饑輸米濟其鄉里

王世耀汾陽人拾獲票錢還之遺者

呂蠟堂汾陽監生家貧事親孝好讀書授徒里中年艾無子一旦鬻田產得數十金盡以償債舉先人木主葬祖墓側懸已像於庭焚楮奠酒闔扉而去不知所終題壁云今日去紅塵北邙路上行在世二萬七千又九日不少他人半分文張應恭汾陽人有氣節勇於爲義所居宅有樓爲火所焚以先人畫像所在奮身撲烈焰挾以出鬚眉皆燎不顧也家素裕以好施中落老益窘光緒三年賑饑司事者籍其名呼令領米辭曰吾不能賑人而乃食賑乎竟餓死

侯星煜介休人家素裕累世共產食指以千計義舉甚眾平

時待以舉火者恆數百家丁戊大祲輸金數萬助賑當道匾旌其門

郭可觀介休人授職提舉中年喪妻以有子不復娶好佛持戒律甚嚴而務施濟邑中義舉多所倡始有水田千畝籍入官者三十年以其歲入建義倉及辦公之用

李清榮孝義增貢篤於孝友村酋多水患咸豐中出資開渠疏導居人始無懸釜之慮瞻族賑饑信義羣孚

崔鵬揚永甯武生村居以事至城遇孀婦爲其家迫嫁者力阻之至爲歐爭涉訟事旣已乃厚資婦以全其節

劉士賢永甯監生嘗販粟數舟至龍門目擊荒形惻然憫之悉以施濟又嘗齎重金買陝之拓石川亦盡以救饑所購田產或舊主窘急則還之

杜子良永甯監生所焚遺券至數千金張德熙村農也道拾遺鏹訪還之

以上汾州府

陳昌期澤州貢生有學行少與兄昌言築堡禦寇幾濱於危後姜瓖之變其黨張斗光據州城以書招登樓峻拒歲祲倒困以給悉焚積券鄉人爲立碑頌德

徐恆澤州諸生家饒好施濟明末歲饑恒創修寨堡以工爲賑人獲錢米復得所保聚焉

王重新陽城人沈厚饒智略明末寇亂見執僕某請以身代賊義而俱釋之捐貲築城煮粥賑饑人賴以安闔將劉忠攻城亟募死士馳報大軍圍遂解及大軍勦平姜逆復詣軍力白縣民不叛狀胥免勦洗生平助婚葬治道路義舉甚多田雨時陽城諸生性剛直嗜讀書尤邃於易明季闖賊渡河

遣其黨徇澤潞邑人議迎賊以紓禍雨時抗大義斥之乃止
比賊至攜子微典猶子慎典避山谷慎典幼且孤負之以走
雖失其少子不顧後乃徐求得之年八十二卒後祀鄉賢
王杞陽城人有贈勇順治初流賊逼縣郭杞與縣人潘貞守
禦有勞時募死士詣大軍杞慨然請行潘貞者善火銃賊當
之輒斃圍既解一時兼義之

曹民悅陵川諸生孝友慈和年饑與兄民信共輸粟以賑鄉
里事聞偕旌

韓瑁沁水監生順治庚寅饑出粟三百石周里黨當明季時
率村人修郭壁北寨寨甫成賊至村中數百家恃爲保障
衛正心澤州人官福陝中軍守備歸設義塾建文華書院入
腴田贍之造迎旭橋永安堡平道路給貧乏里民祠祀焉

王游澤州人好行其德修太行山道自州至高平九十里行旅便之歲蝗蝻助人掩捕視所得多寡給以錢人爭趨之歲不爲災又嘗設義學焚積券以子廷掄貴封榮祿大夫

聖祖仁皇帝書古稀人瑞四字以表賜焉

宋威澤州人康熙辛未歲饑偕從弟興德出千金市粟以賑衛楷澤州人康熙己卯副貢性孝友居鄉多義行辛丑大饑蠲金三千佐賑雍正癸卯復以歲祲糴粟河南減價平糶

李重華澤州人嘗道拾千金訪還其人壽臻百歲

蘇天福高平人性慷慨嘗捐修文廟及太行東路百里

李培壽高平人內閣中書事親孝工文章好施設藥局濟人歲饑煮粥以活貧者

常思聰高平人辛丑歲饑勸父出穀濟眾以節儉力行重於

鄉凡戚黨孤貧無依者胥收養之

邵綸音高平人奉祖訓忍饑餓三字終身不忘父卒有貸券甚夥遵母命悉召貸者還之宋先正者事親孝亦多義舉司九經高平人孝友忠厚平生好行其德待以舉火者數十家負債不償者悉折其券弟九儀諸生多才藝亦以尙義稱孫永祚高平人事母有孝稱經營社倉十餘年出入維謹設義塾多所成就築丹水橋以濟行旅王寅薦饑出粟助賑都勲陵川歲貢耿介孝友康熙壬子遷廟學多所創建而不專其名與貢生曹延庚曹延禧諸生武靖遠耆民武雍李孔懿皆身任其勞靖遠工詩廉介尙義著有家訓及唱和集姚可頓陵川人嘗倡設義倉備荒王珪和參化原貢劉堯裔皆敦倫重義闕恤里黨王彩與兄彭及劉端並於康熙間出

粟賑饑

楊呈秀，臨川人。歲饑，出所蓄分濟族里。道拾百金，訪還之。韓學山，沁水諸生。工詩，與武生牛士奇並。見義勇爲，出資助葬。張玉鑑亦諸生，精醫術，施藥餌活人甚眾。賈思溫，沁水廩生。幼聘韓氏，未娶而女盲。韓以無力，媵從許。其別聘思溫曰：「果爾，女將奚歸？」遂娶焉。

張建純，沁水人。置義田，贍族。捐千金修石幢險道。

柴居敬，沁水諸生。辛丑大饑，出粟千石濟人，而焚其券。同時以賑饑著者，有諸生王明德、中書王錫五，皆力救鄉里。

李萃然，鳳臺人。饑歲煮粥施賑，代完里中貧民徭賦。王耀吾者，家僅中貲，而慷慨好施，急人之急，奮身不顧。

史溥，鳳臺人。由拔貢官福甯知府。性豪邁，好施，予篤於友誼。

千金不吝最精算學當世稱之

賀掄高平人事母孝篤於師友師事李棟棟老失明歲時存問沒後恤其子耗財數千金無怨色其他稱貸羨支往往折券去籍族里婚葬不給者貧不能讀者歲濟其乏

張瑞高平人與兄友愛析產讓肥居瘠好施戚黨多待以舉火

袁九錫高平人議敘衛千總嘗獨力葺文廟並設歲修經費乾隆乙卯歲歉出金周濟六村

張洪聲高平人嘗於逆旅中獲遺金守還其人其後有焦潤貴董自福道拾遺金聞於官以待失者還之

祁斯清高平武生性亢直好施予歲歉貸粟不責償助族人舉四世喪修井坡路以惠行旅

李耀傳高平監生質直好義雍正初舉孝廉方正力辭不就貢生李樹庸諸生楊純奇監生李全印李瑜及子培恩並慷慨好施王文字賈人也亦有義聲

張錦陽城人好學嗜古以舉人任清豐知縣有政績屢忤上官以事謫戍尋赦歸時邑多積弊民力不堪錦請於邑令宋革之鄉人頌德所著有蜃樓集塞外詞擬古諸詩行世

劉元鈞陽城人事母孝親友貧者恒周恤之買僕服役多年僕母見之而泣折券遣歸

陳汝樞陽城人嘗置祭田以收族乾隆壬子大饑減已食以濟鄉之貧者張依仁者嘗修所居潤城堡亦有義聲

郭守璧陵川人以友愛聞於鄉里康熙辛丑出粟賑饑乾隆初開高嶺鋪路十里北通路府建石橋於三道河同時王中

瑗亦於縣南香磨河側鑿山開路歷二年乃成行旅惠之

王慎修陵川貢生以捨宅建書院爲巡撫阿所旌居恒焚券恤貧施藥救疾著有鳴情草

張爾相陵川人孝事繼母讓產幼弟歲歉悉免佃租各恤其家任子兆亦以孝友著睦於鄉里時賑恤其困乏

郭壯京陵川貢生乾隆戊戌春旱購米三百餘石以賑貧乏徐最都燕段德麟並陵川人以疎財尙義推重鄉里

王肇賢沁水耆民與同里吏目王廣孚各散穀數百石以賑貧乏戊戌壬子又歉肇賢子千總煥章復賑穀三百餘石同時柴永保亦兩次罄產賑饑監生高舜年嘗積粟百餘斛於戊戌盡出以佐賑

賈炳沁水人授職理問嘗捐資修沁河浮橋楊生葵村民也

發願開走馬嶺道卒成之至今皆稱便

崔景春沁水人好施予重然諾解紛排難里黨德之尤篤於宗族建家祠並著條規訓子弟以禮法

張潛鳳臺廩生事親以孝聞親沒奉兄維謹姊家貧迎養四十餘年族中孤寡無依者量給錢米同治間旌

史宗經鳳臺人戶部員外郎嘉慶中獨修貢院士林賢之

張士達鳳臺人由拔貢舉鄉試第一所居周村當衝途堡寨久圯率村人修築完固同治中寇警時聞晝守禦策一鄉恃以無恐家居教授從遊甚眾

王增高平人黠達好施鄰有田某悍而無賴稱貸者屢矣一日以破屋索重價增無以應卽慢罵至唾面奮拳增不與較終假貸以售其屋田老益困帶索而行見增愧赧欲避增復

厚給而遣之韓承基者亦好行其德救災恤鄰古誼可風郭位臣高平人事繼母以孝聞嘉慶中歲薦饑散千金以賑張學志高平監生慷慨好義有族子積逋甚巨貸者將訟之官學志爲排解代償不令兩人知其友聞而質之曰言則彼終身愧或且持還是余獲美名人不蒙實惠也聞者歎服李士英高平人寬厚好施值除夕偷兒潛伏牀下士英知之呼出則素識也與粟五斗置諸橐並綈袍一襲戒之曰慎勿然偷持至家妻問所來以實告妻怒曰此豈復人行幸李公長者速持橐往謝偷至則有死者經諸門復歸告妻喜曰適感李公德無以報遂偕往負尸懸諸北山松枝明旦夫妻往謝徐白其事士英厚酬遣之其他事率類此

趙鉢陽城監生嘗輸五百金修治山徑行人感之

李重勤陽城人賈於豫之新安集道光癸卯河決中牟水將至出貲捍禦一村賴以無恙馬志經亦賈於太康值歲饑倡輸錢粟以賑人感其惠

崔曉陽城人性敦友愛荒歲賑贈鄉里逋券積五百金盡焚之陳從誥監生咸豐庚申歲歉與從子安出粟散給村人甯衛卿陵川人舉嘉慶庚申鄉試居恒樂敦善行修社義倉捐鄉會費僉爲倡勸晚學岐黃以濟人

都九疇陵川歲貢事繼母以孝聞善撫弱弟調恤族黨捐地基擴修文廟以孝義旌子賦三舉甲子鄉試第一

李薪陵川人道光間出粟救荒並施籽種又焦恆福者亦嘗於歉歲散粟濟貧

秦能復恩貢韓方昭增生並陵川人與耆民王德峻秦夢麟

並以敦倫重義見稱鄉里

張雍彥沁水人事繼母以孝聞與弟相友愛居鄉敦禮讓盡信義急人之急常若不及鄉黨愛慕久而不忘監生李陞榮亦居鄉有行義年踰九十卒

柳春芳沁水人嘉慶九年歲歉出粟分濟七村監生李文蔚亦於道光乙未賑饑

李初芳沁水副貢乙未歲饑出穀接濟鄉里一時賴之村鄰沁河一日客七人冒雨渡值漲中流舟壞七人得淺渚核焉日夜號救初芳聞之急令善射者縛餅於矢隔水傳餐而出重貲募善水者結筏救之皆免於難

張佩書沁水歲貢道光丁未歲禮偕兄竹書買米平糶咸豐己未旱饑復行之村人多賴以濟著有沁濱詩文集

李世昌沁水人嘗遵父志設義學同治初村羅蝗災出積粟散之不足復糴以濟全活數百口秦學斌亦嘗建義塾以教其村子弟縣令旌之

李九盛沁水人與弟九功出金修大嶺道危險者悉鑿平之行旅頌德

以上澤州府

楊宦大同人慷慨好義多膂力姜逆之變其黨恣行擄掠宦潛結里中少年奮白挺擊殺賊數人乃散走村民獲安

樊榮大同人授職千總性孝友父棄孀妾於外既而生男父沒收養之家居施藥施樽修橋梁焚契券好善不倦兄秦亦尙義嘗修雲岡山路工未半而沒榮竭力踵成之

鄧有聲靈邱諸生事母以孝聞順治兵變後繼以歲歉族人某以荒田書券界有聲挈家避去爲代納其賦五年會蠲糧

豁徭地值倍增乃召某歸折券還之

全觀吉廣靈人姜瓖之變土豪李青聚眾攻城勢張甚觀吉夜縋城走詣大軍求救隨至城下大呼曰天兵至矣縣令率民團開門奮擊與援兵合賊敗走擒青斬之城賴以完

靳皇柱大同人父希林有行誼皇柱承父志好義益力康熙己卯大疫西山煤傭死者尤眾暴骨於野皇柱置義冢瘞之而令傭皆散棲以絕傳染有病者募人善視全活甚多云王訓大同人拾遺金訪還其人

于懷漢懷仁人以孝獲旌又多義行撫孤姪設社學贖難民周貧乏樂善不倦康熙甲辰蠲賑千石全活甚眾副使曹溶作歌以美其事魏敏果象樞和之

已見孝友重出

魏正心懷仁人性仁厚孝友善事孀嫂撫孤姪有恩康熙間

由歲貢知沐陽縣號循吏及歸足不履公庭歲歉分食米煮粥活人捐貲掩骼代完族人徭賦義不勝紀年九十卒陳嘉猷渾源恩貢性介不苟取與於道獲金二百坐竢遺者還之不告姓名而去

劉國威渾源諸生見義勇爲州人宋某嘗事副將鮑虎同伴誣以盜金坐贓三百榜掠下獄追償累年國威憐其冤助五十金得釋還

劉宏典靈邱人康熙甲申歲祲代完里民逋賦邑令區旌之藺朝海廣靈人拾還遺金

吳之琳陽高諸生以孝義旌兄子振宗早夭母老子幼琳爲經紀其家二十年無間言有徐某者常寄百金其家人不知也徐死召其子還之又嘗拾還遺金

羅光陞天鎮諸生居鄉多行義扶危濟困不憚於資有世僕董某李某者子慧而文光陞檢券還之俾隸別籍後皆起家其仁恕類此由太學授歸善丞清正廉明多惠政

燕奇大同人好施修橋築壩助人婚葬于世德貢生亦有行誼嘗築隄捍水以衛鄉里有以貧鬻子者量力贖之

李遇春大同人慷慨多膂力急人患難嘗偕客遠行有商某攜資從而後途遇劫盜羣引去眾皆喜遇春日賊以我眾不敢逼某商在後必不免與人同行而不同患非夫也躍馬追盜及之發矢斃其一餘皆遁走

楊光烈大同人耕讀養親喜趨人急歲饑里民范某閭某方鬻妻光烈勸阻之量給錢米而閭執不從乃詣縣白其事官杖閭并罪買者嘉其公義匾獎之

山陰縣志卷一百四十三 列女
孫正忠大同人幼貧傭賃奉母積資稍裕輒喜施給有盧姓者賈七年不歸母老貧不能活受錢廿緡將醮其媳正忠如數遺之令勿嫁未幾而盧還雍正間歲饑日施米五升以盡爲度後雖有年亦如之年九十四卒

李逢春大同人乾隆戊申歲荒罄貲代完同里官逋縣令嘉之籍其村逃亡遺產盡畀逢春田皆墾闢如初歷數年漸有攜老弱歸鄉復業者乃各以原產歸之同時監生龔德出粟徧貸其村次年春復興販粳來役者皆取食焉

郭淵大同諸生事親孝乾隆庚午出粟千石以濟饑民晚年取積券召負者至悉焚之

張瑛大同人喜周貧士家蓄婢有謀買爲妾者堅不許擇偶令嫁李世佐亦縣人同里有鬻子爲優者傾囊贖歸

仝有恒大同人家貧服買養親性慷慨喜任恤同里某攜妻
孥入部落魄殞死一女鬻豪家矣急解囊代贖還並資之子
瑞諸生以孝聞好義尤篤乾隆中修茸廟學經營甚力

張仰賢大同居懷仁陶埴爲業山村地磽确又早霜秋賦
無抵仰賢盡數代納又時助人婚葬矜孤恤寡人爭述之
陳竹渾源人少孤貧有弟散失萬里尋覓數年卒遇以歸
勤苦治生家稍蘇好善不倦巡檢葉某罷官去妻棺寄僧舍
不蔽風雨竹爲擇地浮葬後廿年葉二子來迎喪更厚助之
周光宗山陰歲貢居鄉調恤鄰里信義可風任朔平府訓導
子尙赤歲貢有孝行

郭養吾山陰人出金建桑乾河橋長六十餘丈行人賴之
鄧開先靈邱諸生孝友尙義嘗拾還遺金事母撫弟力竭其

誠舅氏甚貧迎養於家子女婚嫁皆力任之

李殿廣靈人平生與物無競遇殘廢癰疾量力救濟嘗於村東鑿土室冬置火夏置水以濟行人親執勞役歷年不倦趙元龍天鎮人嘗夜坐有偷兒入室執之乃鄰村某也以貧告厚資之俾營生理終身隱其姓名子燕武諸生亦有行義乾隆中丁糧未盡攤歸地畝久之爲貧民累燕武率鄉人力籲於有司得均攤如例羣惠焉

李士雋天鎮武生乾隆庚子薦饑村多逃亡士雋籲諸縣令得寬除徭役自備籽種耕具廣爲招徠居數年田盡闢生聚踰於昔時值旱復多方賑貸遂不爲災孫顯瑞諸生以時平治道路橋梁道光壬辰飛蝗入境率村人力捕出資爲倡程步瀛渾源廩貢道光壬辰歲饑竭力輸粟以助賑丙申年

蝗入境賑如前州人耿瑄亦兩次振救輸粟數百石

白有財渾源人拾遺金訪遺其人

田製錦渾源廩生性慈惠族有早孤子女無依者夫婦憐而收養之歷十餘年婚嫁皆資焉鄉里咸稱盛德

劉智適應州諸生性孝友授徒鄰村時值隆冬有張氏新娶婦爲壻所譴夜半逃入書室智適理遣不得避居別所秉燭以待天明送歸曲爲勸諭張子感其義和好如初

豐景新應州武生嘗還遺金鄉人義之

劉統靈邱人性仁厚而勇於義從叔沒妻挈子他適統聞之力爭子歸撫以長爲之授室族黨嘖嘖稱之

王坡天鎮買人也道拾遺金徧訪遺者還之

趙時升天鎮武生以千總注選所居濱桑乾河地多斥鹵導

村人引玉泉石門諸水資灌溉久之悉成腴壤道光丙申歲

歉設法振貸濱河諸村得免流亡又倡立宗祠社學

以上大同府

郝道貴左衛人順治己丑兵燹後城舍邱墟漸有歸者競尋

財物道貴獨檢覓尸骸得叔伯父母遺體親負以葬姨母張

氏避亂失所不憚千里尋得之奉養如母焉鄉人稱之

牛射斗平魯人勇而好施人多德之由守備累擢貴州總兵

盧時泰朔州人所屬樓臨大道故貿易地也晨起必讀書其

上有閭姓攜五十金來易米未及授金會沽酒醉去遺金於

梯後時泰得之持告父曰此必閭物也父故長者慢應曰汝

藏之時泰曰他人物藏之何爲兒必不以五十金喪平生父

喜曰是吾心也翼日閭復至請緩糴期時泰曰無庸五十金

在是遽出示之閭愕然請中分時泰固不受人皆高其義

趙亨清左雲人偶有營兵劉朝選假餽歸伍路遺其銀亨清拾而還之朝選請中分謝不受雍正八年事聞旌賞

董萬全左雲恩貢孝友素著兄弟皆早逝其妻矢節奉養甚至戚黨貧者必量力周給矜孤恤寡鄉里稱其仁厚

以上補平府

侯廣甯武人兄弟友愛家無閒言遭流賊之亂賊渠嘉其義相戒勿犯姜壤叛執其兄慶將殺之廣冒死泣請願罄家財六千金以贖慶乃得免鄰人李某遭誣被繫復力援白其冤家由是中落不恤也卒年八十子一國壽至百有二歲

趙玉偏關人萬姓鬻鹽客也古朴敦氣誼姜逆之變萬被回惑玉力諫不聽已復涕泣道之辭甚苦亦不聽遂走郊外古廟中自縊以死懷中自書一紙曰吾妻賢子孝可無死第緣主人失算禍變將作遂爾先期捐軀有知吾者持此白主人

則吾瞑目於地下矣蓋以尸諫也萬訖不悟旋罹禍

弓大成偏關人姜逆之變遣其黨圍老營堡時堡將羅他出或欲延賊入大成獨不可曰死生有命奈何以從逆生乎乃登城誑之曰堡小且無兵固願隸麾下第昏夜難辨埃黎明當啓門也賊信之伏城下乃潛移大礮發之賊多死會羅亦統兵至賊遂大潰堡獲全羅給守備劄大成固辭不受

張選明故官萬鍊僕也已丑之變鍊自焚死眾僕皆分掠資財而散選獨還泣謂鍊妻郭氏曰今日之禍勢不得苟且偷生以遺主人地下羞郭遂偕妾陳氏並縊妾曹氏不肯從選手刃之乃縱火焚其宅選亦自縊死

孫成章甯武人事繼母以孝聞道光壬辰丙申兩次出粟一千二百餘石濟其鄉人鰥寡孤獨周恤以爲常郡闢鶴鳴書

院出重資爲膏火費士林推之以遊擊注選未仕卒

田秀甯武人授職理問好施濟道光壬辰出貲助賑戊戌歲
饑亦如之前後輸錢四千餘緡郡中義舉無不力程其事

李名英五寨人嘗捐立義學以教里中子弟同時賈光衡李
光裕李元裕並有義聲元裕嘗舉孝廉方正其後有諸生郭
藩邦者亦喜推解將卒取積券盡焚之鄉里皆稱道不衰
以上甯武府

右諸府屬四百三十六人

又一百七十
三人附見

山西通志卷一百四十三